

謝在杭詩序

黃白仲與余抵掌海內詞人遂及閩生而指屈
在杭謝君才橫絕一世蚤歲登壇所稱詩峭藉
秀偉卓然名家爲人軒軒霞舉亭亭物表趾高
視卑冲襟可挹且薄收效于三事而厚殫力于
千秋異日者與子東面而爭牛耳之盟必夫夫
也不佞逡巡避席曰主臣余雅知在杭夫閩山
水秀甲齊州靄爽之氣蜿蜒磅礴盡發此時亦
來之俊雲蒸泉涌先後通名字不佞者無慮數

十家削牘有至萬餘言者洞目賊心觀聽于走
爲巨要以閩中白眉則首推在杭亦猶海錯之
推西施乳荔支之推陳紫江綠而山川之措武
夷九滌也不佞向慕謝君往年嘗賦詩四章將
訊之吳興尋如金閭藁爲雲間人篡去不得達
又一歲而晤在杭虎林酒鎗茶鼎不律如意相
得甚驩不佞酒中戲語在杭五霸桓文爲盛降
而秦穆楚莊漸以萎蕪再降而卑之乎吳子欲
承一時之乏妄規此物踉蹌黃池之上卒爲天

下咲不佞與弁州新都交臂接軫則亦惟是邾
莒滕薛之奉齊楚秦晉爾自兩公卽世此物漫
無所屬而海內操觚者如雲亡弗張目搯擊起
而爭之世有虞于不佞者極口而訾極力而擠
若惟恐不佞之一旦蹙弧以登如日之有腎必
去而後快不佞軒渠我其鷓雛耶腐鼠此物久
而鴟尚嚇我且桓文旣沒余豈不度而爲吳子
哉余且跳而託于團焦淨業矣以故遇世之嗜
古而操深心者急名而鼓盛氣者才望旣久而

勢可幾者人地未至而力可副者余必長跼奉此物進之力副而勢幾則在杭其所爲峭嶠秀偉軒軒亭亭斯登壇之器白仲之人倫鑒不爽也在杭別後使使以詩序見屬余業撰一首詒之使者乃爲殷豫章浮沉又不達而故艸又尋逸去在杭數以詩責逋會余奉大諱毀甚不能搦管居一歲而始爲勾當則不能舉舊作一語遂更著成篇工拙不可知大都視舊作加詳焉兩纂著而兩不達豈亦有數耶不佞近論詩

如瑯琊歷下有才力而寡性情務聲調而乏自得繇兩公爲政士爭趨之成風風人之旨殆盡必也取三謝之清蒼救六朝之浮靡采王孟之簡澹濟李杜之沉雄令天真與奇藻並爛名言與勁氣相宣斯其極則妙境哉在杭辨此審矣不佞性疏而輕名根應世詩文無論多至洋洋纒纒千萬言寡至寂寥數語徃徃援筆矢口布之通都工拙惟命近以學道戒綺妄疏筆研人購之未嘗不應應愈援筆矢口了不經意其以

夫夫才盡而舍旃幸甚蓋不能峻龍門拒人文
不能苦心竭力而與海內爭此物則亦惟名根
輕故爲語操觚諸君子無復以腐鼠嚇我哉余
之銜壁輿櫬久矣

萬曆丁酉冬月東海友人屠隆緯真父撰

下菰集目錄

卷之一

古樂府

擬漢鏡歌十八首

朱鷺

思悲翁

艾如張

上之回

翁離

戰城南

巫山高

上陵

將進酒

君馬黃

芳樹

有所思

雉子斑

聖人出

上邪

臨高臺

遠如期

石流

長安有袂邪

飲馬長城窟

枯魚過河泣

野田黃雀行

公無渡河

華山畿

思公子

陌上桑四首

自君之出矣四首

劉生

五雜組二首

兩頭織織

無人行

棗下何纂纂

邯鄲才人嫁爲廝養卒婦

楊白花

估客樂二首

猛虎行

卷之二

五言古詩

從軍行送老卒還鄉

短歌

早春登烟雨樓

秋夜懷陳女翔

舟滯四安

甲午元日

送周喬卿還家

代王百穀悼亡三首

江上晚行

與客問答三首

甲午歲

過釣臺

苦蚊

乙未元日試筆寄社中諸子

送陳幼孺還家

初秋作

牛女詞

感懷

十月望同徐興公顧長卿泛舟碧

浪湖登浮玉塔看月

馴鴿篇

鄧女高王玉生徐興公陳未奉集郡齋

哭弟

偶書

雪

五憶詩

沈休文

孟東野

趙子昂

孫太初

徐子與

同陸履素轉運胡元瑞孝廉鄭翰卿山人汪肇邵太學汎舟西湖至淨慈寺
效謝體分得意字

早秋遊玉蓮亭

冷泉亭

送伯孺四首

猛虎行寄吳翁晉

題畫贈吳翁晉

卷之三

七言古詩

登接筍嵯

蠶婦謠

三品石歌爲吳樞季太守賦

月夜懷陳女大

送周喬卿遊姑蘇

送沈伯含進士之燕

少年行

送吳翁晉之金陵應試

男兒行

女兒行

贈何郡丞

登吳羌山

登雷峰塔

感懷

夜讀陳惟秦詩

賦得三峽猿啼送人之蜀

南風歌

秦逕山吊秦美人

捕蟬行

雪後鄭翰卿招遊湖上

送王玉生還家

百憂行

送陳永奉還家

茗溪草堂燕集觀牡丹放歌

橫海謠一首

卽事呈陳伯孺

錢唐逢鄭翰卿

錢唐七夕

乞巧詞寄桃葉侍兒

韜光庵金蓮池歌

一片雲石

大水謠二首 丙申歲

擊鹿行 并引

九日鄭翰卿震卿招遊南高峰

題胡德長小像

戲寄翰卿

送陸履素入朝

卷之四

五言律詩

塞下曲

賦得新柳送別

萬年宮謁武夷君

武夷謁王司馬祠

建安道中

度分水關

入郡署

壬辰除日

癸巳元日橋李道中

讀寧夏露布四首

登鄆縣松雲寺

登孝豐五山

行部舟中

黃龍洞望太湖

謝王百穀見貽詩序

登潘司空毗山二首

生女二首

登道場海天閣二首

歸雲庵謁孫太初墓

舟中雨

連以善令君招遊半月泉謁大士像

喜周喬卿來訪

郡城晚望

紀事二首

秋雨

董宗伯招飲山齋二首

迎春感事

癸巳除夕

寄陳伯孺

苦雨二首

茗溪草堂雜興十首

吳山中夜聞笛

攜李舟中懷徐興公

吳山晚望

九月晦日送人之楚

送徐惟和北上二首

十一月望夜同惟和碧浪湖看月

宿吳山玄妙觀

客夜寄家

乙未春舟滯柘湖苦雨

二月餘杭道中

舟中作家書

舟次鹽官縣

喜陳幼孺下第見過

出錢唐

舟泊富陽

寄沈從先

常山道中

月

九日

夜

送人之咸陽

哭董伯念二首

聞王百穀喪姬且病寄之

江上早行

哭子

哭女八首

乙未除日遲家信不至

孤客

春夜同鄭翰卿黃白仲孤山尋梅

卽事

錢唐送康元龍

同臧晉叔陳伯孺遊歸雲庵

伏枕

丙申書事

游天聖寺見其荒廢有感

江上阻風

汪肇邵招遊法相寺同鄭翰卿賦二首

秋日偕鄭翰卿胡德長汪肇節遊龍井

二首

石屋二首

靈隱寺

韜光庵同周喬卿賦

贈鄭震卿時以尋兄至錢唐

九日送周喬卿之青田

游虎跑泉

登吳山三茅峰二首

紫陽庵

王百穀過訪二首

安吉苦雨

行部孝豐道中

重與連以善游半月泉

丙申除日

丁酉元日

春日郊行五首

登樓

贈鄭性之

凌稚哲使君招飲山亭六首

五月

攜李烟雨樓懷張幼于

南原

丁酉除夜鄆縣寄內

五言排律

賦得金陵王氣送陳永奉南遊

生子

端陽日陳幼孺過飲草堂因懷同社得

咸字

偕鄭翰卿遊飛來峰得庵字

卷之五

七言律詩

之茗溪留別社中諸子

延津吊潯陽羅司李先生二首

遊武夷

宿武夷天游觀

清明

登峴山

感事二首

登橋李城懷古

古意二首

擬高常侍送王季一少府貶衡巫

夜遊玉磬山

范將軍招遊西湖

送烏程袁尹赴虞部

九日登峴山懷往歲芳艸之遊寄陳振

狂徐興公

雨中登道場山

至日

白蘋洲夜泊寄懷鄭翰卿

贈黃道元

登橋李烟雨樓

題東嵐秋思卷

登愛山臺

清明重過王村禪寺

錢唐懷古

聞徐惟和北遊寄之

淞江舟中

舟過南潯飲董大宗伯宅

十月吳江舟中晚望

飲黃白仲娑羅館留贈

甲午除夜自樵李歸省

送王玉生遊吳

登鹽官秦逕山

送程彥之遊塞上

病中書

舟中病陳參軍以詩來問

壽同安李令父六十

病中逢鄉人

雨

秋夜

七夕有松陵之行寄內

乙未初度感懷二首

夜坐

贈鄧女高民部

寄贈車子仁太守

送陶別駕歸楚

哭張函一廣文

秋日同鄧女高登道場山得青字

過歸雲庵吊孫太初得秋字

十月

時有播師又倭假道於浙入貢

喜徐興公來訪

冬日同徐興公顧長卿世卿登峴山得

冠字

輪臺

黃白仲徐興公見過分得歸字

贈顧道行先生

送徐興公之姑蘇

康元龍自寧夏歸談邊事有感二首

鄧女高招遊毗山同王玉生徐興公陳

永奉賦

送徐興公還家

丙申元日

錢唐逢鄭翰卿

同鄭翰卿黃白仲汪肇邵遊淨慈寺

早春對雪寄葉進卿太史

遼陽

春興二首

哭顧道行三首

錢唐逢胡元瑞賦贈

郡齋閒居陳伯孺見過

登慈雲嶺

夏日陪郡寮登黃龍洞望太湖至夜歸

卽席作

寄曾人倩

病

題林純卿孤山精舍

秋日偕陸履素轉運鄭翰卿山人汪肇

邵太學登北高峰四首

題天竺寺

閏八月望日偕伯孺署中觀月二首

送鄧女高還朝二首

九日偕鄭翰卿震卿陳伯孺錢象先登

南高峰二首

贈錢象先

秋日屠緯真黃白仲鄭翰卿震卿見過

吳山署中時屠黃二君持齋

送查別駕挽粟之金陵

丁酉迎春

早春感懷

夢歸

送吳翁升之金陵二首

東山

飲傅金吾別業二首

陳女翔見過

初夏鄭性之董崇相見過

道場山訪老僧不值

送鄭性之歸閩就試

吳山晚望寄屠緯真

秋夜碧浪湖懷鄧女高時女高將有嶺

南之役

題朱侍御清音閣

戊戌元日舟中

題姚伯道臨雲閣

得報徙治留別諸同志

卷之六

五言絕句

聞漁歌

碧浪湖晚望

蘭陵逢故人

舟過七里灘

月夜江行

枕上聞鳥聲二首

錢唐觀潮

采蓮曲二首

宿吳山樓二首

客夜苦寒

六言絕句

姑蔑舟中

題山中隱居

春日舟中

贈行脚僧

故鄣大雄寺對雨一首

舟中二首

七言絕句

吳興竹枝詞十首

西湖棹歌四首

官人斜

遊武夷雲窩懷陳孔震司馬

癸巳初度日病

宿吳山寄長安舊人

攜李迎春二首

雨夜懷陳振狂客嶺南

檇李元夕雪

薛校書像

中秋登郡城樓

觀天聖寺畫竹趙子昂妻管氏作

閨思

寒食山中

夜同鄭翰卿黃白仲步至孤山尋梅

吳興後竹枝詞四首

錢唐逢康元龍

錢唐訪陳伯孺不遇

登慈雲嶺

西湖雜詩

右六橋烟棹

右三竺晚霞

右石屋晴雲

右桃溪花雨

右九里松風

右孤山梅月

右鷺嶺觀曦

右龍泓漱玉

右錦塘春柳

右綵鷓紅粧

題月輪山

登五雲山五首

江南詞

春日樵李舟中寄僧圓憲二首

中秋雨寄桃葉侍兒

聞鐘寄曾人倩

菰集卷之一

陳留謝肇淛著

東海屠 隆選

古樂府

擬漢鏡歌十八首

朱鷺

朱鷺魚以雅水淺蒲如瓦鷺何食食蒲下鷺飛
啞啞誅者則寡

思悲翁

思悲翁髮種種今人田昔人塚松栢無附柯不
如艾與蘿已而已而鬼其餒而

艾如張

艾而張羅有鳥戾高天有魚沫深波艾而張羅
可奈何豹則有皮犀張兩觜以爲君衣

上之回

上之回中千騎控青絲屬車玉玲瓏馳道三千
里夜歸甘泉宮赫耀日月驂兩龍匈奴臂斷月

文通天馬來樂無窮

翁離

擁離趾中可築室安用葺之琳與碧擁離趾中
將誰與爲容

戰城南

戰城南死城南白骨如麻烏啼其間爲我謂烏
腐肉何知馬革未得裹不如充子饑青海何冥
冥飛砂曠白日新鬼無姓名舊鬼不得食念爲
忠臣忠臣安可爲但見爺孃送子行不見爺孃
收子屍

巫山高

巫山高不可梯巴水深不可厲山高多荆棘荆
棘齧我足水深有蛟龍龍鱗不可觸美人勞我
心胡獨在空谷

上陵

上陵五色雲彤芝如車蓋下有甘醴泉丹穴流
沆瀣仙人服食之遊於九垓外授我九轉丹導
我凌太清棄我青玉杖矯步朝玉京舉手緱山
上時時鳳笙音

將進酒

將進酒紛萬舞鏗繁絃考賁鼓有酒如泉明月
在天人生不樂髣髴已斑東海有棗華不實安
得健步追廻日

君馬黃

君馬黃臣馬蒼二馬同逐出東方君馬白臣馬
黑二馬同逐出南陌狐狸在梁龍在野牛虎觸
鬪死野雀飛不下以陰以雨於何去女

芳樹

芳樹中庭倚難其華言思君子我心交加有鳥
食竹實集我朝陽岡大鳴徹天地細鳴中宮商
豈無百卉芳好音寔難忘

有所思

有所思乃在南山之阿東海之涯海水何漫漫
日莫風以寒有所思所思無窮期流黃不得拋
不如槌碎之月出東方日没于西思君君不知
不如割置之

雉子斑

雉子斑十步一啄石梁間石梁之水瀰且漫豈
不能高飛遠食玉山禾上山多雪霜下山多網
羅雪霜尚可網羅殺我

聖人出

聖人出鳳皇鳴六龍飛上天百蟄澤中驚燿火
自謂明不如日月光天地定厥位聖人立中央

上邪

上邪上邪下安得正爲君良獨難爲臣諒匪易
龍逢烙萇弘死天門多雷霆野草皆枯燬不如

磨堯堅服食以延年

臨高臺

臨高臺高臺高以軒上有日月之長天下有大
海迴波瀾桂蕙裝黃金錯之白玉欄飲此旨酒
香且寒令我皇帝三萬年

遠如期

遠如期南有游龍北有葳蕤蓬生額上苔繡衣
燕母二燕子三子長忽飛去母啼空梁間狐生
九尾於何渡河遠如期可奈何

石流

石流濺濺思佳人時相見有草曰江離繞珮投
贈之欲與君交請君不疑日月不西昇大海無
還期秋風發兮晨露零木葉下兮鴈南征鴈南
征歸復北思君安終極

長安有狹邪

長安有狹邪高軒不容竝道逢二紫衣問君宅
與姓我宅城東頭易知復難求太子關內侯中
子刺冀州少子舉孝廉初爲京洛遊三子俱上

馬夾路光迴眸三子俱入門華軒照翠裘三子
俱登堂兕觥旨且觶大婦鋪綺羅中婦敕肴羞
小婦粧初罷洗手調箜篌丈人坐勿起滿引聽
清謳

飲馬長城窟

飲馬復飲馬來去長城下
風吹白沙愁雲連
荒野去年城朔方今年戍隴北草枯戰馬死城
邊堆白骨生子莫生男壯出老不還生子莫生
女哭夫又哭子昨夜見軍帖匈奴圍馬邑健兒
盡出鬪婦女炊軍食軍中三五日征人無消息
賤妾何聊生从君裹馬革

枯魚過河泣

枯魚過河泣飲恨言不得不恨金錯刀但恨餌
香粒尺書不能傳剖身復何益寄語龍與螭出
入慎其服

野田黃雀行

野田有黃雀高飛何翩翩中道遇搏擊翅折落
九天少年喜得雀炙之登玉盤人生苦如寄憂

患何相煎

公無渡河

公無渡河河廣風威多天柱東南傾日月相盪
摩檣楫忽不戒化爲泥與沙公無渡河公竟渡
河不見公歸惟見黃河之水翻綠波君爲石尤
風妾作精衛羽吹水水不乾更啣南山土南山
土盡河水竭此恨悠悠方可滅

華山畿

華山畿白楊飄素旄天風慘以悲郎旣爲儂死

儂何獨生爲願作鷦鷯翼相比不相離

思公子

春風生兮水流春草綠兮芳洲思公子兮不歸
羌獨倚兮蘭舟

陌上桑四首

鬱鬱陌上桑皎皎桑間女含情不自言東風吹
羅紵

鬱鬱陌上桑呢呢梁間燕夫婿在遠方珠簾爲
誰卷

鬱鬱陌上桑盈盈花間露故人不如新
新人有時故

鬱鬱陌上桑粼粼水中石年年湖水清
照人無顏色

自君之出矣四首

自君之出矣霜露淒長夜思君如槿花
紅顏日凋謝

自君之出矣羅衣度秋雪思君如連環
何時可斷絕

自君之出矣鸞鏡生塵暈思君如芳草
隨君行遠近

自君之出矣錦衾染紅泪思君如落花
無言但憔悴

劉生

劉生天下豪結交皆少年殺人
不避仇白眼看青天走馬雪花
落射鵬柳葉穿歸擁胡姬臥金
貂當酒錢

五雜組二首

五雜組玳瑁梁往復還燕雙雙不獲已守空房
五雜組金條脫往復還青天月不獲已愁腸絕
兩頭纖纖
兩頭纖纖鴛鴦枕半白半黑迴文錦
兩頭纖纖膊膊
秋聲冷磊磊落落離人影

口無人行

北風如刀殺百草地裂水枯戰馬倒口見凍死
勅勒城漢兵夜圍天山道堪口口口口口口口
胃飲口口口口無入今邊塵秋士卒脫兜鍪牛羊

不夜收陛下萬萬年臣爲關內侯

棗下何纂纂

棗下何纂纂榮悴各有時但得青鳥栖不異瓠
樹枝棗赤人不食鴟鳩朝暮啼不見蕙與蘭幽
谷空華滋

邯鄲才人嫁爲廝養卒婦

二八良家子承恩入丹闕淡拭雙蛾眉皎如新
秋月常得君王顧轉盼生顏色豈知陽臺雲隨
風落荆棘宛轉下玉階脉脉腸斷絕貴時不悟

稀賤日敢辭辱回首邯鄲宮渺若河漢隔君看
摩笄山亦有望夫石

楊白花

宮城千萬樹不如楊白花白花白於雪隨風南
去入誰家日落江南道春心繞天涯年年春風
生芳草愁殺楊花爲誰好

估客樂二首

估客載大舸日夜水中居豈不懷故鄉故鄉米
如珠

估客長干人來往三江口郎家小橋西來時有
書否

猛虎行

饑不食猛虎餘寒不栖野雀窠白日載馳暮志
士可奈何

詩集
卷之一

下武居於終之一終

國家圖書館, NATIONAL CENTRAL LIBRARY, TAIWAN, R.O.C.



下菰集卷之二

陳留謝肇淛著
東海臧懋循選

五言古詩

從軍行送老卒還鄉

太白秋亘天，
口雛窺青海。
前軍夜合圍，
夜奪單于壘。
彌弓上新弦，
勁馬蒙重鎧。
血滿川原腥，
雲愁天地改。
功成百戰餘，
老去一身在。
腰間雙寶刀，
缺盡無光彩。
往事春夢中，
驚定還自悔。
空巷

無四隣倚杖柴門外

短歌

客莫辭清尊聽我歌一言人年幾滿百百年亦
晨昏昔時健犢兒今抱乳下孫嚴霜被弱草榮
華豈久存草死春還生人無復起魂寂莫身後
名榮辱向誰論不如飲旨酒醉臥驅憂煩

早春登烟雨樓

春水與天碧雲色澹人心坐來不知寒烟林深
復深芳樹變啼鳥殘雪明遙岑惘然理歸棹

流鐘磬音

秋夜懷陳女翔

涼風下木葉蟋蟀鳴我堂河漢當前楹耿耿夜
未央舊燕知新社北鴈哀南翔端居感物化搖
落悲衆芳眷彼同心子乃在天一方白日日趨
短相思日趨長豈無萬里翰慰此九迴腸不見
參與商夜夜未相望

舟滯四安

暮春人意困况在孤舟間澄江度遲日子規啼

空山一啼復一歎凋傷遊子顏吾聞東園公採
芝猶未還

甲午元日

羲和無停馭寒暑一轉轂流水不返源華髮難
再綠作吏春復冬強半謀參朮如何青陽氏短
景彌相逐東風解河水柔條吐新簇物情有代
謝我生猶雖伏蚤歲懷素心中道失初服在家
親戚憐出家豺虎毒如絃棄道周屈曲傷我足
所以貴聖人被褐而懷玉

送周喬卿還家

短歌無餘聲送子還故都勁風凋馬毛密霰散
長途奚囊負輕裝中惟雙湛盧貂裘不堪着故
園日荒蕪舉世希知音齊王好者竒駿馬空有
骨美人但按圖所以大雅士鬱鬱無所如且登
越王臺爲我吊無諸興亡已陳迹人世真蘧廬
貧亦不足憂貴亦不足趨達人有大觀君子崇
訐謨去去勿復顧雙涕零交衢

代王百穀悼亡三首

人事多參商譬彼弦與管十五事君子素心同
明月弱絲附高枝欣此千秋托紅顏不羽翰安
能久爲客夜臺何茫茫虞淵無晨日死者日以
長生者日以短爲妾語君子努力加食飯

出門望北邙白楊森纍纍悲風從天來霜露何
淒其花落不歸枝水流不返西紅粉委芳草香
塵空蕙帷秋氣急鳴蟬蟋蟀中夜啼落月照流
黃恍惚如見之豈無少君術慰此長渴饑

達人知天命修短不復疑身世一蘧廬天地有
盡時吾愛鼓盆子忘情觀運移爾旣反於真而
我猶人猗不見彭與殤百年同所歸

江上晚行

曰余失初服陸沉寄遊宦忽忽暑云徂行行日
已晏黃葉幾家砧殘霞數聲鴈風螢墜還飛蘆
花開未綻遠山漸欲沉微星乍可辨漁燈出窮
浦蛙鼓鳴幽澗布帆捲浪輕舟子乘枕慣豈以
林澤心乃有風波患自知世皆魔轉覺身爲幻
不見潛天蚪蟠飛安可羨

與客問答三首

甲午歲

門有萬里客來自東南方不借如飛鳥意色何
倉皇主人揖客坐設食開中堂客食不舉筋欲
言涕沾裳發篋授尺書讀書一何長上言親戚
喪下言離亂傷

長跼挽客裾故鄉今何如客但再三歎故鄉不
可居連年旱復蝗民無旦暮儲官府禁遏糴富
室急追租五月初三日餓莩謀通衢白丸斫腐
商赤丸掠村墟骸骨亂如麻處處狐與鳥脫身
得西走但幸保頭顱

主人聞客言涕伏不能興出門東南望哀哉晉
安城昔爲桑與麻今爲荆與榛白髮在高堂游
子瘡寒驚燕雀知故簷牛羊知故垆歸種南山
豆會俟黃河清

過釣臺

咄咄嚴子陵未必真避世安車入漢廷諫議非
其志懷仁輔義言玄理竟未試垂釣豈在魚此
意誰能契我欲往從之敝屣安足棄眷茲一片

石忽墮千古泪榮名亦黃土何用復軒輊不聞
至人言知希則我貴

苦蚊

中宵蹙翠幃白鳥何翩翩嘯聚喧成雷嗜膚不
得眠但恐涼風來驅入塵埃間造物惡用爾微
命竊自全君看菌與椿各有小大年

乙未元日試筆寄社中諸子

玄冥既潛功青陽初秉和嵎谷回薰飈層林葉
朱柯仰盼衆芳轉俯悲人事過莫以紅顏故空
令哀蹉跎妄意千秋業冉冉今如何寄言各努
力幸無俟黃河

送陳幼孺還家

吾以五斗米折腰笠澤濱朝來拭塵鏡面目亦
可憎故人天外至重尋鷄壇盟吐舌唾清論使
我心魂驚自言對公車挾策上帝京獻賦不見
收剖心誰爲明操瑟復何之歸聽閩山鶯白髮
在高堂遊子若爲情且飲一杯酒送子孤蓬征
風塵無自苦造物有枯榮試聽匣中劍猶作雌

雄鳴努力在千秋微尚安足營

初秋作

一葉下高樹天地忽已秋明河耿長夜大火西
南流牛女佳期近欲度還復留人生多離恨天
運固阻修沙際雙白鳥縱翰何夷猶因茲有冥
契願與靜者遊

牛女詞

秋露冷天階明河如素練黃姑與織女歲歲來
相見相見卽相離合情不能語雙泪落九天散

作三秋雨

感懷

日月如矢激二十忽有九老大私自憐書劔竟
何有豈以龍虎性而從牛馬走賸對蒼弁雲誰
典烏程酒蛛絲上層簷燕泥落虛牖庭收霜後
枰畦剪雨中韭俸僅飽妻孥跡已絕賓友一官
嘆積薪萬事同敝帚昔如逐兔鷹今作守鷄狗
吾愛柴桑翁悠然棄五斗寄語舊東山猿鶴今
在否

十月望同徐興公顧長卿世卿泛舟碧浪

湖登浮玉塔看月

斜照入寒山落霞滿秋水刺舟碧浪中坐看孤
雲起風急蘆花飛霜清木葉墮明月忽飛來寒
色射四坐玉鏡半空開金光百道繞時挂浮圖
巔還如慧燈照漁艇弄橫笛棹破水中影斷鴈
哀遠天踈鐘隔遙嶺夜盡露氣微相對澹忘歸
澄江淨如練却媿謝元暉

馴鴿篇

虛庭栖馴鴿雙飛何翩翩玉剪文翼齊羽衣白
雪鮮一朝失其偶奇音向誰宣窺沼舞孤影悽
惻不能言衆雛中夜啼聞者鼻俱酸君看一鳥
微存歿無棄捐人情非金石反掌生波瀾感此
發孤嘯悲風吹歲寒

鄧女高王玉生徐興公陳未奉集郡齋

宿雨旣云霽新醪亦初熟天末逢故人感嘆骨
與肉孤月生高松寒聲滿修竹欲別意茫然風
塵多愁目

哭弟

往年哭汴弟我泪如河决今年汝復亡使我泪
成血死者長已矣生者空蘊結吾父頭半白汝
兄髯如戟雖有五歲兄瘦小未成立得汝能笑
言稍亦寬胸臆豹文卽未斑牛氣或可食豈其
玉樹枝乃委螾與騰造化固小兒修短一何忒
茗溪多雪霜風沙翳白日故園三千里長天黑
如漆可憐幼小魂歸路何由得招汝早歸來毋
離父兄側

偶書

醜明立堂下一言遂見知太阿埋古獄人猶拂
拭之嗟哉千古事今時棄若泥石破方見玉穎
脫方知錐鷓雛栖蓬蒿竟爲斥鷃嗤曳尾者何
人願言獲我思

雪

朔風薄長天凍雲不到地白日無精光密霰藹
而至歷亂柳絮飛恍惚天花墜綠蕙積廣庭入
隙凝塵筥玉樹旣繽紛瑤階亦霑被素容冶可

親寒輝宛自媚陰沴良不渝年豐已呈瑞獨有
孤羈身心驚雲物異閉門學袁安布帽聊卒歲
五憶詩

沈休文

王風降黍離吾道久墜地嶰谷無遺音誰辨潛
澠味隱侯生知姿幽討窮玄義遂啓四聲傳予
載發霧秘老來帶孔移風塵多顛顛觀其郊窟
篇似亦遠名利遐哉景行思遺音誰與嗣

孟東野

貞曜有軼才濩落不諧世晚歲尤軼軻一官如
疣贅材大不稱身竒文衆所戾榮名固有時何
必當其際寒溪長風鳴古垣蒼藤翳逸軌安可
攀睠言盟薜荔

趙子昂

吾憐趙王孫適丁陽九會北面羶罽朝無乃遭
時晦毫素迴天工意氣抗百代誅茅水晶宮脩
然吸沆瀣寥寥三百年作者非其類鷗波多悲
風墨亭空蒼藹丘壑亦變遷風采復安在遺墨

下菴集 卷之三
在殘碑亦足神相對芳洲薦白蘋臨風發哀酹

孫太初

太白有山人脩若雲中鶴抗志入青冥逃光在
幽谷旣栖南屏峰隨卜茗溪築俛首事婚嫁亦
已失初服羽化竟何踈黃土高峯律不朽有令
名安在留其骨惆悵歸雲庵芳草年年綠

徐子與

正始失其傳作者競戶牖曩靡喪元氣情性復
何有徐子超津梁直繼何李後大鳴徹古今細

鳴金石扣中原固多才觀察得八斗乃有伯道
悲亦無彭聃壽嗟余來不辰荒墳蕪已久隕涕
讀遺言地下亦吾友大音知者稀獨坐空搔首
同陸履素轉運胡元瑞孝廉鄭翰卿山人
汪肇邵太學汎舟西湖至淨慈寺效謝
體分得意字

水色浸稽天客心悲遠地風日多清陰安得不
沉醉憑虛俯崇陵眺迥挹空翠盤擎崩崖松繁
衍曲池芰密簪蔓且荒倦雲飛復墜平岫入孤

舟踈鐘辨遠寺輜檠蕩夷猶初地啓霧闕坐送
千里目妙演三車意空色皆蔓根清淨本玄詣
神理倘不渝勝賞亦有至京洛多風塵會當脫
敝屣

早秋游玉蓮亭

秋雨送新涼湖水亦漲綠惜此殘荷花斗酒烹
葵藪日落亂峰橫天曠歸雲獨渺渺波上帆瑟
瑟澗中竹月出魚乍驚霞飛鴈相逐山色有會
心寧但清人目興來藉草坐狂歌響千谷冉冉
風塵間何時返初服

冷泉亭

孤峰自西來飛泉日東去翠色倒寒波鏡裏夫
容樹草合澗已空石古亭猶踞潺湲日夕聲冷
然澹人慮雲散白練橫月落青山曙一夜秋水
生奔濤若灑灑垢念已盡消塵纓濯何處長嘯
起松風憑虛恍可御

送伯孺四首

送子下菰城秋氣何慘悽賓鴻唳南陸落葉紛

下
修遠衆芳旣云徂遊子當安之挂席逐晨風振
策奔織離握手復欲別意滿難致詞天長望不
及延佇中傷悲

傷悲亦何爲天運固有戾人生非匏瓜安能久
相繫脩鱗狎頽波勁踏隘顛地姬子雖云都不
如惟與悴它鄉美且穰無若丘與隧但得故所
歡何用復歔歎努力征途間睠言加飡食

來時春郊明桃李齊作花去時天雨霜水國多
蒹葭葉晷日已短蕙衣日已單鷺去空梁冷遊
子何當還眷此綢繆意矢心在歲寒

歲寒彫高梧犬吠籬菊邊丈夫咲入門兒女相
牽纏膝下拜慈母顏解復泪漣四鄰聞我來壓
酒擊海鮮苦樂各相勞夜靜聲更喧少年歎不
言咲贈遠遊篇

猛虎行寄吳翁晉

丙申冬余行部至孝豐翁晉侵晨來謁
道爲虎所困從者救之獲免賦此唁之
猛虎欲齧人不避賢與豪夫子蘊明德胡爲在

蓬蒿窮冬風怒悽陰谷於菟號意不在狐兔豈
嗜礪中臊自顧雞肋涼寧足充老饕鼠肝與虫
臂安能去子逃甯戚困飯牛彌明亦搏葵豺狼
當道行孤凰哀嗷嗷天運爾何知耽耽求其曹
拔劍裂山石別有黃公刀驅爾渡河去蒼生看
建囊

題畫贈吳翁晉

幽禽栖枯枝不息惡木陰以彼百尺莖托此千
古心好音爲誰惠孤芳安可任鷹隼欲相妬終

歸嘉樹林

下菰集卷之二終


下菽集卷之三

陳留謝肇淛著
延陵吳稼塏選

七言古詩

登接筍嵯

危哉接筍嵯乃在碧落裏上閣丹梯七百層下
臨深谿不見底行人攀木如窮猿一步一息驚
飛魂白雲時從足底過天語半在空中聞須臾
梯盡復石壁仄徑逡巡半容足鐵鎖橫絕翠微



巔遙似寒星亘天闕我來振衣步蒼苔捫參歷
井真崔嵬對面不見更衣臺玉女賓伏如嬰孩
中有羽人斲山骨珠宮貝闕訇中開黃鶴之飛
且不到此惟有海日天風時往廻吾聞海上有
蓬萊弱水環之無塵埃日月爲轂霞爲杯此中
無乃是秦皇漢武胡爲哉下山十里月如水咲
掛青蛇歸去來

蠶婦謠

三月湖邊柳花飛吳興街上河豚肥春風少婦

親於玉素手攀桑大堤曲日日求桑夜不眠眼
望絲成衣得穿春蠶三眠猶未起門前聞有催
租吏

三品石歌爲吳樞季太守賦

吳公宅前幾片石狀如伏虎質如鐵故老相傳
三百年蒼稜盡蝕土花色突兀三峰削不成龜
紋犀理漫縱橫忽疑屋裏青山出頓覺滿堂烟
霧生秦皇鞭斷漢柱折雙影對蹲中孤立奇態
豈無神護訶玲瓏祗有雲出入君不見集賢學

士趙家子手題此石墨尚泚文采風流無復存
空留片石荆榛裏我來踞石坐便欲共石語丘
壑還如見古人臥遊何必親杖屨醉來拔劍斫
蒼苔古今勝跡總塵埃蘭亭金谷俱已矣一泉
一石安在哉但當對石快飲酒莫思身後令心
哀落葉滿階月墜地高歌一曲城烏起

月夜懷陳女大

女大老子興飛越當年醉我採山蕨窻前涼影
雙梧桐金杯倒挂青天月月今隨我渡茗水雨
地清光幾千里末夜思君君不知明河落盡鴉
聲起

送周喬卿遊姑蘇

有足莫畏行路難有泪莫作臨岐別男兒一經
死牖下何異禪中老蟣蝨陳生已去周生來南
雲千里北鴈哀長風吹冷吳江水送君獨上姑
蘇臺君不見吳王昔日高臺上西施醉舞鮫綃
帳繁華寂寞反掌間荒臺麋鹿空相向舉杯勸
君君莫辭遇合何必在當時貧賤富貴眼前事

千載悠悠知是誰

送沈伯含進士之燕

五月衰楊不堪折
憐君遠作燕山客
江飛欲盡不盡雲
馬踏將殘已殘月
月滿菰城酒在壚
相逢不醉胡爲乎
君今通籍歸三殿
我且扁舟向五湖

少年行

貴不必上將軍
富不必黃金穴
春風一騎金連錢
踏遍長安三萬陌
飛劍斷取仇人頭
咸陽關吏不敢收
日落胡姬酒初壓
繫馬卸下花貂裘
男兒不作女兒態
君但引滿百不憂
君不見羲和西匿水東流
丈夫年過五十不樂死
卽休

送吳翁晉之金陵應試

朝發白蘋洲
夕望鐘陵陌
丈夫快意遊
寧知遠離別
鐘陵八月虹
爲橋看君意
氣干雲霄
鳳凰臺上馬蹄疾
慷慨何須問六朝

男兒行

長與男兒最輕死
多在公門少在里
水田力薄

下
租稅繁十年逋負官倉米私開菱蕩爭捕魚負
鹽夜向四安墟不然東人太湖去日望 朝廷
下赦書

女兒行

歸安女兒多佳麗椎髻赤脚入城市十三嫁夫
學哺蠶蠶稀不足衣食費夫壻經營長不歸爺
孃相惱鄰里欺幾回欲逐琴心去却笑相如尚
布衣

贈何郡丞

何郡丞挺嶺南人也始至遺余雙倭刀
余以朱絲琴答之賦此爲贈

美人贈我倭赤刀何以報之雕綠綺半天紫氣
入首山一片清心寄流水昆吾發刃三尺短龍
門孤枝尚未爨目中已信無全牛指上還疑有
歸鴈清莫清於脫光之冰鏹悲莫悲於繁絃之
羽激鷓鴣膏寒霜作花水龍吟罷風吹葉知君
愛我如王祥我亦思君若中郎攜琴換刀各有
意精材神物兩相當方今南北風塵黃爲君一

下初集 卷之三
擊中山狼更斬鯨鯢落機槍歸來高枕白玉床
刺桐花下秋月光七絃泠泠被宮商儵如鸞鳳
鳴朝陽君不見陳留謝生少且狂三年奔走茗
溪傍四海之內皆兄弟感君意氣神揚揚排山
倒海不足惜詩成問天天應泣酒酣拔刀碎胡
琴一雙白眼何人識

登吳羗山

吳羗已去留霸蹟謝公亦有登山屐千村落日
炊烟青一片孤城秋水白峰頭石篆半爲苔雲

裏老僧不識客欲拚簪紱付滄洲自分烟霞成
痼疾

登雷峰塔

雷峰古刹臨江左寶篆香消翠烟鎖落日空歸
伍子濤浮屠半入謝仙火老僧卓錫峰之巔繩
床布被抱雲眠西湖歌舞有時盡青山白雲不
記年

感懷

我年二十七足已半函夏寄食梁楚間歸返閩

下邳集 卷之三
山下蚤歲負雄心讀書兼騎射受知王瑯琊萬
言曾倚馬翫麟傲千秋意欲策長駕勒石燕山
頭草書玉堂夜坐使元氣還狂流回大雅誰知
此意竟隱淪謁來作吏太湖濱皂衣烏帽腰長
折滿案簿書多苦辛城中黃塵如雲起日出關
頭迎長吏五月炎風熱似燒半夜寒霜凍於水
有山不登浮玉頂有水不汎菴蓋溪山頭紫芝
應長咲溪上白鷗還宿疑昨寄封書舊酒徒故
園松菊將荒無青山白業堪長往好將吾道問

潛夫

夜讀陳惟秦詩

惟和自南來手持玉玻璃中有五色囊云是陳
生詩我來燒燭開一卷滿地龍蛇忽驚見怪底
雲霞千萬重玉屑如花飛片片秋釭剔盡歌未
闕如意擊殘壺口缺獨夜時聽風雨聲虛堂已
聞神鬼泣月印空潭千頃寒雪壓孤峰一天白
又如泚水立赤幟坐令趙卒無顏色陳生陳生
風骨殊少年不患肝腸枯誓將大業俟千載豈

與里耳爭錙銖
腊鼠漫稱鄭客璞
彈雀寧用隨侯珠
君已泥塗甘曳尾
我今丘壑從此始
會須拋却五斗米
與君共釣龍江水

賦得三峽猿啼送人之蜀

君不見蠶叢鳥道連
三峽兩岼清猿啼不徹
淒淒風露月明中
行人聞之心斷絕
送君西行秋已分
正值猿聲日夜聞
一聲一泪一回首
萬里家山空白雲

南風歌

我船西北來海風
東南急南風識我苦
相留欲去還遲三五
日寸雲吹合千山青
惡浪飛翻一天白如
叫如怒驚夢魂欲定
不定愁傾側林莽蕭
蕭五月冷地坼山摧
忽已暝叱咤但聞雷
雨聲紛拏時見蛟龍
影長年徙倚不敢前
使君望之心茫然安
得長繩繫風伯一夜
飛度閩江邊悠悠南
北皆吾土寄謝南風
無相苦更聞北地氛
塵高幸吹口口勿南
度

秦逕山吊秦美人

下菴集 卷之三
鹽官城北山前寺艷骨香消幾千季人去空餘
草木春夜來猶識金銀氣玉輦東巡不復回六
宮歌舞生塵埃荒墳片石猶堪吊試問咸陽幾
劫灰

捕蟬行

悲蟬依密樹側身避螳螂稚子拈竹竿引線捩
其吭苦心自合吸風露委蛻寧免飼螻蟻人生
災患夙所嬰小知營營徒爲爾

雪後鄭翰卿招遊湖上

天涯客不歸湖上春初至一夜西風雪滿林不
知梅花已開未雪晴花滿水如烟南北高峰色
接天更有主人能醉客不妨臥向玉山邊

送王玉生還家

江上梅雨惡問君何所之君言遊已倦歸返閩
山隱閩山五月雲爲峰荔子枝頭十里紅我已
陸沉慙柱下君應潦倒臥牆東

百憂行

行年三十頭已白撫劒中宵百憂集四海風塵

游子驚國是未定孤臣泣天狼未殞海波腥烽
火夜照國西營士卒已罷遼左戍將軍空築受
降城近聞 朝廷遣封使金章玉帛豈論費鴨
綠江邊浪正高馬島山頭塵猶沸天使趙趙不
敢前野心狼子終攜貳彼此消息兩茫然國事
無乃同兒戲古來和戎非上策况撤藩籬使之
入廟堂議論付黃口百萬赤子非魚肉已巳庚
戌鑿豈遠至今戰鬼夜猶哭憂天杞人不得眠
秉鈞元老籌須孰莫愁軍需無所措宮中聞有

大盈庫

送陳永奉還家

永奉書生也未知游乙未冬爲其從子
要之吳道相失至姑蘇城下爲盜所劫
奔金陵丐衣於其從子時方盛寒從子
以葛衣畀之凍餓幾死適遇周喬卿徐
興公衣食之得達茗溪余始爲治歸裝
而歌以送之行

十五攻文史二十學詩賦半生未曾出郭門萬

里安能向行路行路難難於上青天丈夫豈肯
受人憐女有負郭二頃田家室胡爲輕棄捐瘦
馬夜衝越溪雨布帆秋冒吳江烟吳江烟盡寒
生早鼓鼙滿地生荒草暴客嘯起綠林村王孫
啼向白門道身竄荆棘餐糟糠風奔露宿勢蒼
黃人情對面隔山嶽骨肉亦化爲豺狼若非故
人相憐念會當凍餓死誰收女骨蘇臺傍茗溪
水清魚可數孤客蒯緱聲彌苦滿座誰知陳孟
公乞食寧須謝仁祖二月春寒晝陰陰遊子思

家意不禁高堂白髮柔腸斷茅屋青山落葉深
送女出門泪如水離思歸心兩悲喜逢人若問
遊何如但得舌存亦足矣

茗溪草堂燕集觀牡丹放歌

茗溪三月春無主桃花落地柳花舞草堂晝靜
午未開卷簾幾度清明雨雨過蒼苔花滿園紅
明綠暗鶯聲繁主人企腳不理髮安能束帶向
朱門牡丹初綻大如盃幾枝偏傍南窗煖亭亭
凝笑復含羞座客見之魂皆斷姚黃魏紫不足

愛丹霞剪作神仙珮國色寧容蜂蝶侵天香未
許芝蘭配日照露晷無不佳臨風映水尤多態
恍如燭龍銜耀倒挂珊瑚枝明珠萬斛光琉璃
又如妃子初入浴香水滑膩流胭脂三千粉黛
見之無顏色而况與羣木百卉爭芳菲主人惜
花惜欲死日日花間臥不起若使花神解語時
謝公何必東山妓名花愛客不辭紅客來莫畏
酒杯空今日看花不盡醉明朝花落生秋風君
不見風吹花開還吹落今日花開不如昨可憐
人面不如花安能長在花間酌酌君酒爲君歌
日月疾於東逝波人世開口那能多花乎花乎
奈爾何

橫海謠二首

黑風吹海海水立烏王張顧龍女泣修鯢翻波
千里濕爰居已集東門樹精衛空啣南山石
射潮弩短無長箭釜山草枯滷濺面天使騎猪
向南趨元戎出金募樓船三軍泪落如紅霞

卽事呈陳伯孺

石榴花下浮大白客來懽呼脫巾幘元龍豪氣
未能除手援五木成盧塞馮陵大叫不肯休百
萬金錢付一擲郡舍如冰放衙早盤薦楊梅坐
芳草舟中誰贖溫太真坐間竟識袁彥道君不
見中原鹿走楚漢爭何如蠻觸相持衡仰天大
笑各分手寒山日落茗江橫

錢唐逢鄭翰卿

少年作客不還家裘馬快意天之涯豈能區區
守妻子手足繫係如匏瓜去年寄食薊門秋日

日使酒臥青樓今年遇我錢唐上醉挾強弩射
潮頭一雙白眼大如斗俠氣向天天爲愁酒酣
側理掃千語寒光紫氣非吳鉤青袍白幘厭奔
走回首故園多離憂故園田舍長茂草兒女衣
食泣道周汝有幼弟能作賦千金安得長門求
勸女行役早歸來四海烽火道阻修嗟余辭家
亦五載聞道桑田近成海故人零落可奈何昔
日朱顏今已改與君俱非少年時世情冷煖君
自知貧賤富貴何足問但當努力千秋期一曲

悲歌不可竟松間秋月漏新影唾壺擊盡空斷
腸蕭蕭四壁蛩聲冷

錢唐七夕

去年七夕松陵秋盈盈一水東西流今年旅食
吳山上望斷銀河度女牛烏鵲南來妬飛燕露
華寒濕夫容面始信人間多別離不如天上長
相見

乞巧詞寄桃葉侍兒

冰壺鳧濯琉璃影天階露凝羅襪冷珠簾初捲
瓜棗陳下拜低聲自陳請蛛絲絡盒夜欲半目
斷秋空雲錦亂乞得巧來郎未歸鴛鴦綉罷空
腸斷

韜光庵金蓮池歌

君不見韜光昔日來西川誅茅駐錫巢溝巔太
守招之不入郭自言引水種金蓮山中松竹千
萬樹夏着蓮花爛如霧色奪龍泓幾片霞香分
鷲嶺三天露人亡事去一千載水色山容猶未
改竹際無人泉自鳴巖前片石雲長在老僧芟

蓮獨種魚隊隊桃花色不如已斲懸崖成佛像
更分澗水注園蔬我來躊躇不得語欲吊遺蹤
向何所山僧送客雲出門目斷西湖采蓮女

一片雲石

風篁嶺半孤峰斜觚稜剝蝕青苔花已驚斧鑿
出神鬼便覺氣勢生烟霞突兀排空色欲墮玲
瓏長有雲飛過夜半頭陀乞米歸疑是老龍當
道臥

大水謠二首

丙申歲

黑風吹浪翠蛟吼毒霧埋林蒼兕走南山北山
夜發洪人家什九清溪中禾苗腹漲半爛死供
得公家餓妻子男啼女哭坐黃昏夏稅新征吏
扣門
去年五月水暴發臨溪饑民拾菱蕨今年八月
雨不解百川灌城如滄海支祁掣山蜃出地杞
人但恐天崩墜君不見西北采礦復開河東南
杆柚今無多

擊鹿行

并引

司李園有牡鹿性喜觸藩一日傷守者
殊死余按其罪獄具募人生致之刺其
血軟馬適鄧司農女高陳茂才伯孺胡
山人德長來會相與批脯痛飲司農口
于鱗擊鹿行不置遂各賦一章以紀一

時豪致

使君放衙日未午半畝園中調鸚鵡狂鹿忽捷
視耽耽跋扈嚙人如猛虎我攜匕首淬濡縷大
呼從者誰能捕突圍似欲觸匈奴走險何能擇

晉楚須臾倚角勢已窘樊中但恨蓬山遠已無
逸足走秦原空有餘魂遊吳苑血落水盤琥珀
凝角摧霜刃珊瑚隕吾黨相看氣轉豪拔髀飲
血背裂盡司農使者頻呼酒胡生陳生各五斗
碧椀縷膾飛銀絲翠釜行羹和香韭膏脂已堪
飽妻孥饜炙猶均分賓友酒酣捫腹舒赫蹠片
言落筆龍蛇走一時醉飽寧足論千秋盛事邨
能朽濟南天目浪得名我輩馮陵出其右更裁
蒼皮贈作冠共揮塵尾不停手意闌大笑出門

去蕉鹿一夢竟何有

九日鄭翰卿震卿招遊南高峯

鄭琰兄弟皆不偶攜我登高飲美酒已知意氣
世無雙更堪令節逢重九露冷空林葉撼撼柳
洲亭畔殘荷泣樹杪寒蟬作瀑啼水邊怪石當
人立峰迴路折日已晏忽驚身在諸天半斷續
鐘聲出白雲微茫塔影挂蒼漢蒼雲飛風怒
號嗟呀石壁挿天高俯視萬峰無顏色却顧大
海生波濤波濤撼山塔欲動丹梯百級勢尤聳

日月長懸舍利光山河幻作菩提種環望東南
十四州黑丸點點如浮漚興亡人世幾千載惟
有山色長清秋君歌鸚鵡賦我典鸕鷀素人生
得意須盡醉莫令黃花咲白頭

題胡德長小像

君不見錢唐胡時驥質如晏子形憔悴前身元
是顧虎頭醉後白眼向天視片帟何人貌爾神
意態蕭颯渾無異偃蹇宜藏丘壑中踈狂豈落
風塵內披圖令我解愁顏便欲抵掌把其臂須

史胡生咲入門門前壁上宛相對筆素遂奪真
宰功始知優孟非絕技嗟乎人生三身皆幻寄
汝形非真畫非偽勸女留此不滅身何事人間
生意智

戲寄翰卿

子真不肯住谷口散盡黃金買紅袖擬作菱花
共月圓那知萍葉隨風走押衙已死崑崙亡可
憐折盡章臺柳歲莫雪霜四壁寒吳山冷落對
虛牖君不見宣城使君百不憂一官數載如贅
疣五湖具得扁舟在請君載取西施遊

送陸履素入朝

使君士龍之子孫文章意氣何孤騫八斗聲華
滿京轂三千坐客傾平原此道由來世所棄一
官牢落不稱意甲第才名三十年博得江南轉
運使竹園官署梨花酒更乞西湖作小友鷺嶺
曦光上紫袍錦塘柳色迎黃綬黃綬紫袍青玉
几采蓮聲中了公事兩高峰月六橋烟不羨當
年白刺史詩成黃鶴已樵碎日莫接羅常倒載

下菰集 卷之三
官貧祗有水精鹽與酎時典金魚袋十月吳山
霜欲落五馬驂驪錦行幕向闕還飛葉縣鳧過
家甞聽華亭鶴衣冠元會春風裏夫容殿上彤
芝曉 天子召見富民侯使君跪進平倭表嗟
余五載別神京一麾出守下菰城玉河柳憶行
時折長樂鐘猶夢裏聽湖海孤臣愁欲絕客裏
邨堪送君發九霄望斷隔紅雲千里相思看明
月一曲勞歌泪盈把悠悠俱在風塵下看君飛
騰會有時當念夷門老監者

下菰集卷之三 終



國家圖書館, NATIONAL CENTRAL LIBRARY, TAIWAN, R.O.C.

一
孫集

卷之三

七

下菰集卷之四

陳留謝肇淛著

太原王穉登選

五言律詩

塞下曲

結髮遠從征長纓請未能
烏窺沙畔骨馬飲血
間冰漢月臨青塚
雲暗白登可憐秋汛近歲
歲益金縉

賦得新柳送別

短岬復長隄黃輕綠未齊曉風吹不定春雪壓
常低草細偏相妬鶯嬌未敢啼年芳君莫問日
落灞陵西

萬年宮謁武夷君

十里翠繽紛征衣上白雲劇憐茗水吏來拜武
夷君峰影中流變松音隔水聞塵心渾忘却不
用更移文

武夷謁王司馬祠

遺廟魂何在行人泪未乾血應春草碧心共遠

山丹斷壁龍蛇老空碑科斗殘西風吹大樹猶
帶陣雲寒

建安道中

風物非吾土寒威凋客顏清霜深抱樹毒霧遠
吞山亂水衝城去孤船逐漲還可憐衰草色都
染泪痕斑

度分水關

鳥道鬱嶙峋征驂駐復難水分閩地盡天入楚
雲寒雨斷溪生白霜深葉互丹迴看故鄉月已

隔萬峰端

入郡署

太傅風流在憐余竹共分樓看茗水月簾入峴
山雲吏散收蠶稅官閒養鶴羣賞心誰得解地
下沈休文

壬辰除日

忽忽冬云盡風塵又一年客魂芳草外親舍白
雲邊獨雁衝殘雪疎梅入斷烟閩山與澗水兩
地不成眠

癸巳元日櫛李道中

客裏逢元日辛盤一度新如何藍尾酒在憶白
頭人律應嘉禾暖花迎櫛李春自憐犬馬齒老
去益風塵

讀寧夏露布四首

一夜欖槍落西南奏凱旋 君王賜貂日壯士
請纓年魚腹孤城疾旄頭太白懸九邊競笳鼓
萬里息烽烟

可歎潢池裏誰招白骨魂天戈未西指官府望

南奔春燕空巢冷孤城殺氣昏積薪兼直突遺
恨党軍門

今日凌烟上功臣亦代興虎鬚李都督馬汗葉
中丞沉竈圍初合囊沙勢已崩賀蘭最高處蕭
瑟不堪凭

露布出幽都天書下太湖拊髀雙頗牧繫頸五
單于海寇驚傳檄君恩早賜酺江南諸父老
垂涕願須臾

登鄆縣松雲寺

絕壁石爲亭遙空岫作屏松濤翻落日野氣隱
孤城鐘過僧初定雲歸鳥不驚忽聞樵唱近處
處竹枝聲

登孝豐五山

出郭息塵機登山看落暉松風侵佛幌花氣上
人衣野水縈橋合寒雲護洞飛仙蹤應在否吾
意欲忘歸

行部舟中

出門何所適孤帆天際昏兩邊山色合永夜水

下菴集 卷之四
聲喧吏夢滄洲遠形骸土木存南方多羽檄回
首正銷魂

黃龍洞望太湖

落日黃龍澗衣襟卽具區東南環窟宅天地莽
虛無水氣平吞越波光半入吳故鄉戎馬在涕
泪滿江湖

謝王百穀見貽詩序

雙鯉到菱湖啣來明月珠才寧論八斗序已重
三都茗水清堪把吳門近可呼不知今夜雪得

有子猷無

登潘司空毗山二首

高閣俯層城憑虛氣杳冥山圍平野綠天入太
湖青鶴夢秋雲冷龍歸暝雨腥夜深松露落濕
却太玄經

空翠濕雲裾危峰削不如天邊白水落郭外綠
楊疎閣有尚書履山多太史書醉驅雞犬去疑
已在空中虛

生女二首

十菴集 卷之四
天上投珠日閨中夢虺時只應隨地寢何意作
門楣慈母含飴慣嬌雛學語遲小郎圍未解若
箇是男兒

老大憐吾往生成望女深桃花猶未語柳絮可
能吟祗益貧門累聊寬病客心夜中絃欲絕留
待問知音

登道場海天閣二首

躡屐出雲間雲烟暗百蠻樓頭滄海日門外洞
庭山老鶴窺人下遊僧採藥還洪崖如可拍吾

欲問仙班

飛閣接天都珠宮控太湖山光圍百雉野色入
三吳木落禽聲盡雲崩塔勢孤東南多王氣回
首起栖鳥

歸雲庵謁孫太初

斯人不復作地下亦吾師海內尋遺字人間有
舊詩寒郊山鬼語古墓老僧知千載歸雲寺猶
存十字碑

舟中雨

下流集 卷之四 六
盡日雨聲愁孤帆去未休蘆花常亂月漁火忽
驚鷗南北方多難衣冠不散憂平生一掬泪洒
向白蘋洲

連以善令君招游半月泉謁大士像

雲嶂雨中青籃舉竹外停泉流分半月良夜聚
雙星石竈丹爲壑松門翠作屏傳來大士戒時
有老龍聽

喜周喬卿來訪

耿耿憶周顛相逢春復冬壯心悲伏驥薄技老

雕龍白髮經年短青山萬事情素交何所贈吾
已媿臨卣

郡城晚望

憑虛聊一望夕陽桑柘稀野氣暝初合江雲寒
不飛山郵悲戍角村杵急秋衣獨有宦遊者愁
看鴻鴈歸

紀事二首

見說渾河北倭奴已罷兵更聞求互市且莫築
降城秋稅催猶急寒笳怨未平書生有孤憤無

計請長纓

日本猶乘勝天驕未請和三軍悲白骨十月戍
黃河大漠炊烟少長城夜燧多 至尊憂社稷
空自憶廉頗

秋雨

積雨入平林遠山霧氣沉時聞歸鴈斷轉見落花
深戎馬他鄉泪扁舟故國心菰城十萬戶處
處起寒砧

董宗伯招飲山齋二首

幽野俯鷗汀扁舟到草亭東山太傅宅南極老
人星晚岫臨江紫寒松濯雨青著書三萬卷咲
殺太玄經

憂國鬢成絲還家友鹿麋兒童看客慣鷗鳥見
人疑露葉翻紅藥雲根護紫芝澤邊垂釣者昨
已夢非羆

迎春

可嘆繁華地淒涼白日眠絲花空有勝桑柘已
無烟暴骨荆榛裏荒城豺虎邊最堪爲客者芳

草又年年

癸巳除夕

四海風塵惡孤城雪色鮮
殘燈送餘臘雙鬢入新年
梅蕊故自好椒花誰共傳
故園雲盡處淒斷向南天

寄陳伯孺

作吏憐吾隱閒居念女遙
夜邀黿頂月秋聽海門潮
避客藏深竹尋僧出石橋
風塵猶在眼叢桂未須招

苦雨二首

去歲苦無雨今春雨較多
桃花濕更落鶯聲寒未和
盜賊已滿地滄洲意若何
閉門饒伏枕一任雀堪羅

竟日風雲色天應洗甲兵
柴門烟斷絕麥隴浪縱橫
米貴人多病桑稀蠶未生
哀哀有寡婦慟哭向江城

茗溪草堂雜興十首

半生懷遠志今日復云何
卽不置丘壑寧能廢

嘯歌苔痕衝屐滿梅雨入簾多作吏身兼隱君
江有薜蘿

一官堪避世寧復受籠樊流水不厭客遠山時
在門新松收雨氣惡竹損牆根一夢遽然覺吾
今亦漆園

吏散誰投牒官閒早放衙客身饒伏枕春夢半
還家雨過移新竹鶯啼聽落花且將白雲意飄
泊向天涯

茗雪東南水雙流似帶圍千家種菰米五月採
蓮衣海近黃魚賤霜多紫蟹肥何時分月俸爲
買釣魚磯

千載謝安石風流不可攀溪中老釣碣流落在
人間蒼弁色未改烏衣燕復還菰城一片月猶
照道場山

郡治東南宅相傳墨妙亭池分剩水綠雲助假
山青往事餘丘壑吾生有典刑徘徊空日夕鶴
唳不堪聽

六月雨意好松風鳴未休虛亭不受暑踈竹已

成秋藤護花間石山當池上樓頽然高臥處便
作少文遊

不覺身爲客江山亦可憐早霜歸鴈後夜雨落
花前樹有報春鳥池饒縮項鱸時邀故鄉月共
泛太湖船

白日草堂靜蘿陰生晚涼碧添浮玉雨黃人洞
庭霜休沐琴爲枕攤書石作牀半窻桐葉落處
處木犀香

風律真堪隱家貧不解愁俸錢都養鶴新句總
盟鷗夜色星臨幔秋聲葉墜樓陸沉何足問吾
欲老菟裘

吳山中夜聞笛

吳山秋露白關塞意漫漫夢斷幾千里人憑何
處欄潮聲如雨急月色帶霜寒衰柳那堪折金
閨泪未乾

攜李舟中懷徐興公

不堪搖落日獨客倚蘭橈古木沿堤轉前山隔
雨遙傲來猶有骨瘦去欲無腰念女草堂靜峰

頭看海潮

吳山晚望

木落鴈團沙江城起暮鴉吳山高處望秋色滿
人家月出潮初上霜深菊未花客魂淒欲斷雙
泪落悲笳

九月晦日送人之楚

西風吹客鬢落葉滿孤城不覺三秋盡猶爲萬
里行路迷湘浦竹舟觸楚江萍別後勞相念峰
前有鴈聲

送徐惟和北上二首

朔雪暗天地胡爲獨遠遊十年三獻賦萬里一
孤舟潮落金山曉風寒易水秋別離何足戀春
色在皇州

作客年垂盡風塵亦可憐路隨人語改月屢馬
頭圓水勢過淮緩山形入岱偏菰城一枝柳聊
作繞朝鞭

十一月望夜同惟和碧浪湖看月

淨水吐片月清光上人衣乍驚漁火出翻共浪

花飛寺遠踈鐘斷江寒過鳥稀峴山烟樹裡無
數暮帆歸

宿吳山玄妙觀

獨坐踈燈暗空堂夢復驚雨聲亂落葉水氣冷
孤城客鬢經秋盡鄉心入夜生寒蛩不堪事故
傍枕邊鳴

客夜寄家

落日高支枕寒城早閉門風燈照影獨村犬吠
聲繁夢裡家頻到貧來劔尚存年年芳草色何

處覓王孫

乙未春舟滯柘湖苦雨

入歲已十日朝朝雨未乾連山積水氣帶雪作
春寒草意青難見梅枝白易殘柘湖烟樹裡好
着釣魚竿

二月餘杭道中

春色忽已半山城花欲繁雪晴生野氣日出見
沙痕樹影沿溪路雞聲隔水村客心正無奈時
復有清猿

舟中作家書

冉冉春光盡悠悠行路難
河經梅雨漲天人麥
秋寒歸夢鐘前斷鄉心
酒後寬遲回題數字雙
泪向誰看

舟次鹽官縣

王氣千秋盡江流三月平
鹽亭村女負魚市海
鮮羸烟堠通蠻徼潮頭
向縣城放船隨返照天
外數峰橫

喜陳幼孺下第見過

空庭雀可羅愛女遠相過
衣典烏程酒囊探燕
市歌雨深芳蘚合春盡
落花多一別長安又西
山近若何

出錢唐

江色連平楚潮聲滿驛樓
長年上水怯五月度
關愁野竹深通纜巖花
低撲舟灘頭風雨惡驚
起白沙鷗

舟泊富陽

病暍意不愜聊從江上行
巖雲依樹宿林燒隔

十齋集 卷之四 五
村明月出沙侵岸潮生大向城青山看不盡遠
寺暮鐘聲

寄沈從先

早知腰已瘦猶有舌爲田病對青山臥詩從白
社傳壯心同驥伏生計任鶉懸憐女幽栖地何
時割半瓊

常山道中

瘦馬又長途相將暑欲徂瀑流隔樹細野寺迤
山孤林翠晴仍濕嵐光看復無客心時自咲芳

草綠蘼蕪

月

瞥見天涯月相思幾度過三年辭故國未夜望
明河烏鵲南飛少關山北面多鰲峰讀書處松
桂近如何

九日

浪跡悲萍葉山杯對菊花不堪秋作客祇有夢
還家草色平蕪盡砧聲夕照斜愁心與候鴈寥
落向天涯

夜

寒生何太早霜落洞庭枿肺病秋還作歸心夜
不堪星河猶直北鴻鴈已圖南雙鬢蕭蕭短卹
勝白玉簪

送人之咸陽

送爾咸陽道風霜冷不勝雞啼將落月馬怯欲
消冰火後無秦殿回中有漢陵斜陽看故國煙
樹鬱層層

哭董伯念二首

一官不得意三徑竟蓬蒿家爲還山棄名從去
國高新詩白雪調久病赤霜袍放逐何須問人
間有楚騷

司馬愁多病元龍氣未除才應造化忌狂與市
朝踈世有廣陵散家無封禪書數行知己泪洒
向草玄廬

聞王百穀喪姬且病寄之

一失文君後相如渴未消羅衣秋掩淚葦帶老
移腰夜雨鳴蕉葉寒霜損藥苗陽臺如可遇絕

勝廣陵潮

江上早行

榜歌孤夢斷曙色半江分
忽墜波心月驚飛鷗鷺
羣溪聲寒作雨山氣散爲雲
不覺秋城近清笳處處聞

哭子

玉樹委荒原淒涼泪暗吞
生時空浪喜死日尚能言
憐女它鄉骨孤余十月恩
峴山一坏土霜月照游魂

哭女八首

余有愛女夢吾家道韞而生
穎異絕人三齡而死情之所鍾
何能已已爲詩以哭之凡八首

雙髻憐吾暮三年愛女深
雖非男子骨亦慰病夫心
剪紙爲碁局拈紉學綉針
含情一日盡永夜月沉沉

吾家傳道韞得女慧堪憐
貧美常分弟看花喜趁人
死生俱付浙魂氣不歸
閨寒食蕭蕭雨誰

憐陌上塵

憐女奄奄病嬌癡不自持
槿花元易盡參朮竟難支
蠱網藏襦笥苔深醜面池
夜臺無白日弱魄渺何之

愛女豈殊男羅襦弱不堪
人前初學拜語後盡能
諳竹作兒童馬花分祖父
簪傷心在何處月下草堂南

少小識人情蹶跚挽我行
最憐今日死翻恨昔時生
坐畔猶疑影牀頭錯喚名
千行羸博泪淫

向下菰城

風雪年將盡淒涼事已非
荒郊尋弟伴逆旅別親歸
地下無新曆囊中有舊衣
柔腸渾斷盡無泪可重揮

馬鬣掩新封幽冥永不逢
入門無咲語何地見音容
泪向兒曹盡情應我輩
鍾夢中時抱女恨殺五更鐘

去矣復何知彭殤共息機
行人憐素旆慈母哭斑衣
草徑添新鬼籃轎頰舊扉
相呼還自矢獨

對雪花飛

乙未除日遲家信不至

眼中兒女盡愁緒向誰開守歲人頻異它鄉鴈
未來魂隨殘臘去腸共早春迴華髮驚年莫何
心對酒杯

孤客

孤客南冠久風塵北望高心隨閩海鴈病憶廣
陵濤師老皇威損時危小吏勞三吳財賦地歲
歲泣弓刀

春夜同鄭翰卿黃白仲孤山尋梅

春雲寒欲暝月色淨如沙一夜孤山雪前林幾
樹花含霜着不定近水映初斜祗恐花神咲風
塵兩鬢華

卽事

客路依山轉柴門傍水邊夜潮船載月春樹鳥
啼烟里婦輸蕉布山丁種火田時平容吏傲一
任枕書眠

錢唐送康元龍

春盡解寒袍山城足馬勞綠浮新竹葉紅見熟
櫻桃日落觀音渡風吹伍子濤憐君湖海氣解
贈孟勞刀

同臧晉叔陳伯孺遊歸雲庵

昔人招隱地松竹揜柴扉墓木何年拱山雲猶
夜歸燕巢殘佛頂蟲網老僧衣往事空流水悠
悠對夕暉

伏枕

伏枕餘雙泪閒門任雀羅戎心孤島急除目逐

臣多已罷梅花戍還開瓠子河杞人憂不徹聊
作五噫歌

丙申書事

羽檄飛千里天災及兩宮 君王聞罪已社稷
付和戎海汛乘春急山田望歲空孤周有發婦
洒泪五湖東

游天聖寺見其荒廢有感

花宮開縹緲蘇碣蝕饑餬龍向何年錯龜猶舊
日跌幻身歸弱草殘食施伊蒲空有雲千片那

堪布給孤

江上阻風

江上雨蕭蕭，迴船避晚潮。
水腥龍鬪急，日黑虎行驕。
病骨生涯困，羈魂歲月遙。
憑高望關塞，氛祲未全銷。

汪肇邵招遊法相寺同鄭翰卿二首

舍舟登赤岸，秋色散平原。
一徑烟蘿外，山僧開竹門。
鴉啼松子落，鶴起洞雲翻。
何必攢眉去，相邀醉給園。

仄徑穿雲出，危欄對石涯。
心水聲秋撼，寺松瀑夜驚。
僧虹挂臨池，樹猿懸半壁。
藤脩然發，清嘯巖谷答。
孫登

秋日偕鄭翰卿胡德長汪肇邵遊龍井二首

山中雲木合，空翠濕衣裳。
細瀑寒生雨，孤鐘夜帶霜。
僧分香露水，龍下講經堂。
相對渾無語，烹茶坐竹牀。

珠林依水淨，寶地得山偏。
泉脉飛穿石，松根老

帶烟窻容寒岫入榻借小龍眠欲別仍回首空
林聞暮蟬

石屋二首

寶剎瞰危巒重重紫翠攢路排山罅入石罅洞
門殘水氣晴仍濕松聲夏亦寒道人能愛客倒
着鹿皮冠

疊石翠微巔秋聲萬壑連倦雲依洞宿野鬼傍
僧禪谷暗常疑夜崖穿忽有天會將綠玉杖一
接紫霞仙

靈隱寺

西僧飛錫地鷲嶺幾時分古寺惟黃葉秋山自
白雲雨花空外落潮信定中聞便欲吹笙去清
宵鸞鶴羣

韜光庵同周喬卿賦

虛閣倚岩堯高秋氣次溲亂山圍郭小一水接
江遙峰勢全欺寺鐘聲半雜潮平生丘壑興與齋
罷宿僧寮

贈鄭震卿時以尋兄至錢唐

千里尋兄至風霜兩鬢華
逢人空有泪遊子已
無家海月通羅刹吳山繞狹斜
六橋烟柳色妬
殺紫荆花

九日送周喬卿之青田

汀洲一鴈鳴萬壑盡秋聲
正是登高日那堪送
遠行江晴魚網密山曙
虎踪明覓得青田鶴相
將朝玉京

游虎跑泉

衰柳咽寒蟬殘僧敞衲懸
泉餘山虎跑寺穢野
落亂峰烟
狐禪敗榻蛛絲合頽垣
葛蔓穿淒涼不可問日

登吳山三茅峰二首

絕壁亂雲飄江寒霧未消
綠知湖外柳白見海
門潮王氣青山在仙蹤
絳節遙不堪懷古處落
木轉蕭蕭

憑虛何所有白雲秋正繁
孤峰黃葉寺隔水綠
楊村海氣兼天遠山容帶
雨昏蕭然塵市遠不
必問桃源

紫陽庵

躡屐扣山扉秋聲滿翠微
捫蘿翻露濕穿石觸雲飛
晚郭炊烟合寒江樹影稀
采真人已遠何處覓霓衣

王百穀過訪二首

官閒眠鹿圃客至問雞壇
紫氣臨關見青山倚棹看
雨多踈竹淨花盡小亭寒
自咲夷門老塵冠何處彈

風雪暗關河王猷一棹過
青蚨留客少白練乞書多
女已耽玄寂吾寧廢嘯歌
欲將三乘意半偈問頭陀

安吉苦雨

寒色雨連旬蕭條井邑貧
客炊吳地桂官積漢廷薪
野宿狐依火山饑虎趁人怪
來鴻鴈少四海尚風塵

行部孝豐道中

風雪歲已改它鄉吾獸行
崩崖防馬足失路望雞聲
橋斷雲依水山多瘴近城
羈心何以慰天

目晚峰橫

重與連以善游半月泉

並轡出雲端僧迎舊長官三年人未去半月水
猶寒像古爐烟斷亭空壁蘚乾長明惟佛火還
照寶花壇

丙申除日

爰書初報罷兒女斲相親風雪孤燈夜關河萬
里人病憎梅刺眼愁對酒沾巾曉角無端起青
春白髮新

丁酉元日

冉冉茗溪水春光五度歸羊腸時事改雞肋宦
情違南國貂裘敝東方羽檄飛河清安可俟魂
斷老萊衣

春日郊行五首

王孫歸未得芳草又萋萋五馬行春日千山杜
宇啼天迴何嶺北雨過謝塘西吏况何須問看
雲信杖藜

荒徑雪初消春風動柳條蔓藤盤老木野水齧

危橋山氣朝含雨江聲晚上潮會心豈在遠隨處問漁樵

兵戈猶未定村落不勝饑一逕只流水幾家同敗籬雀依新草乳狐渡斷冰疑極目蕭條甚那堪戍角悲

倍惜年華換聊爲一日閒遠尋流水去時遇野僧還林近初聞鳥雲開乍見山東風吹碧浪歸思共潺湲

不盡烏程酒其如芳草何病中春事少門外世情多殘雪寒麋鹿柔風長薜蘿東山舊朋好相對邈關河

登樓

天地方多事餘生且陸沉鳥聲春樹合山色早雲深芳草它鄉泪飛花故國心君看衰病者猶作越人吟

贈鄭性之

詞賦重三都扁舟問五湖不知遊俠氣還似舊時無囊富青田石詩探赤水珠興來同載酒浮

玉晚峰孤

凌稚哲使君招飲山亭六首

載酒碧江隈扶筇曲逕迴地從三竺借山似五
丁開野竹穿牆合新榴覆檻栽定知人散後惟
有夜雲來

怪石幻層巒清池激紫瀾雲歸花洞暝月到竹
樓寒盧橘風翻墮櫻桃鳥啄殘小園麋鹿隊咲
殺進賢冠

啼鳥欺絲竹飛花近繡筵臺高全俯郭垣短半
窺田浦口炊烟直峰頭落日圓主人偏愛客不
惜酒如泉

不意戎王種還隨漢使星屏圍松桂綠坐納芟
荷青榻有催花鼓牀餘種樹經落英紅似錦醉
臥爲誰醒

樓上書千種堦前柳十圍松枝巢鶴遍蒲葉上
魚稀雨過紅萱潤沙深紫荳肥野人來往熟鷗
鳥亦忘機

後會渺難期空令怨落暉舟迴綠野外衣帶白

雲歸泉石膏肅在風塵鬢髮非會須投絃去共
卜釣魚磯

五月

五月未鳴蜩愁雲對寂寥山禽泥滑滑官閣雨
蕭蕭得食豺狼喜欺人魍魎驕萬方征稅急無
地可漁樵

橋李烟雨樓懷張幼于

烟雨暗汀洲蘆花亂白鷗官三三馬走臺憶鹿
遊秋色雙衰髮歸心一釣舟片鴻書不到望

斷夕陽樓

南原

聞道南原破朝鮮半入倭義軍葬遼水飛檄到
交河幕府黃金盡沙場白骨多憂時老司馬和
議竟如何

丁酉除夜鄆縣寄內

吏散鳥啼初蕭條閉綺疏家猶三地隔歲已六
迴除華髮催人急青山入夢踈干戈何日定同
卜鹿門居

五言排律

賦得金陵王氣送陳永奉南遊

送爾尋佳麗鍾陵舊帝都龍飛雙闕在鳳去一
臺孤山色成今古江聲半有無風流全入晉霸
氣盡銷吳井帶胭脂濕樓餘綺繡鋪寒霜凋栢
檜秋水冷菰蒲講殿花猶雨臺城柳自烏興亡
不堪吊且覓酒家壚

生子

半生悲木槿今日試桑弧夢入占熊在毛看似
鳳無雙珠初出蚌千里未成駒神已如茗水家
應卽太湖漸知人笑語先得父膏腴釣碣風流
遠烏衣世代殊草玄吾未敢留取問童烏

端陽日陳幼孺過飲草堂因懷同社得咸
字

佳節逢君日花前杯共銜相從飲河朔何意吊
彭咸浴試芳蘭佩風含細葛衫按琴尋舊譜看
劒拭塵函竹亞當簾檻鶯窺近水巖暗香傳菜
莉殘雨度松杉浪跡悲閩越存亡付楚凡女休

歌短缺吾已托長鏡野與東山屐歸心碧海帆
題詩寄同社泪濕不能緘

偕鄭翰卿遊飛來峰得庵字

躡屐恣幽探捫蘿意未酣青山不飛去雲木鬱
相參磴斷緣晴壁泉飛倒碧潭洞空秋乳淨塔
古暮烟含桂子香龍澗苔花老佛龕鶴啼松外
嶂僧定竹中庵已盡王猷興還從惠遠談醉歸
山路寂間唱望江南

下菰集卷之四

下菰集卷之五

陳留謝肇淛著

南陽鄧原岳選

七言律詩

之茗溪留別社中諸子

與子把臂期入林中途塵網嬰人心年來作吏
顏色惡東下茗溪風雨深戎馬南方警復急芙
蓉江上歲將陰渭城一曲不暇唱仗劒行歌梁
甫吟

延津吊潯陽羅司李先生二首

山丘零落幾經春
故老相傳說使君
華表月明孤鶴夢
郡齋人去落花聞
十年司李官如水
一世浮萍半似雲
天上夜來箕尾氣
行人錯道是龍文

風流文采兩無倫
緱嶺何來控鶴身
宦篋將歸惟有劍
遺編欲授已無人
雙龍潭上天多雨
五老峰頭草自春
一過西州腸斷絕
不堪垂泪拂龍脣

遊武夷

一片丹山翠萬重
寒流曲曲倒芙蓉
曾孫宴罷空留幔
玉女粧成半是峰
雲裡水簾天畔雪
月中鐵笛院前鐘
紫芝瑤草憑誰採
咲駕青鸞問赤松

宿武夷天游觀

玉蕊丹砂不可逢
且憑雙屐問仙蹤
懸蘿絕磴無飛鳥
亂竹空山有斷鐘
壑底雲陰奔似馬
洞前松樹老於龍
月明夜半吹笙罷
我在蓬萊第

一峰

清明

去年寒食客燕都今歲清明傍太湖芳草不知
人獨往桃花何意鳥相呼烽烟海國孤舟在寂
莫江南一字無趺坐高齋人事絕楞伽經對鬱
金爐

登峴山

長風吹水見歸鴻與客移尊扣梵宮峰影倒看
春浪裡鐘聲遙度暝烟中沙光如雪當簾白落

照涵江隔樹紅自是山霧留傲吏故教明月出
山東

感事二首

三月欲破蠶生齊倦眠不得聽隣雞皂衣束帶
何意味風雨泥塗多慘悽南天處處斷鴻鴈北
地時時聞鼓鼙未知顏色向誰是囊空入門羞
老妻

忽聞關白近王京日日官軍請救兵鴨綠江頭
消息斷黃金臺下羽書驚江南遊客愁妻子海

上親知半死生回首可憐罷病後豈堪豺虎更
縱橫

登構李城懷古

吳王城闕已千秋城上雲低江自流亂後戰圖
餘石馬雨中王氣隱金牛草埋秦逕香俱盡潮
到胥山咽未休惟有鴛鴦湖畔柳年年春色使
人愁

古意二首

庭綠初殘花舞簷腰支愁瘦玉纖纖十年遼水
寒衣盡一夜邊風落葉添雲母屏空霜入鏡博
山香燼月當簾幾回綉得鴛鴦枕腸斷金針不
忍拈

搖落西風鴈幾行明河如練露爲霜征人塞上
寒應早少婦閨中夜獨長菡萏難消千古泪菱
花不照九迴腸一從紫燕雙飛去孤負郎家玳
瑁梁

擬高常侍送王李二少府貶衡巫

長安落葉曉紛紛謫宦離歌不可聞草色青時

啼望帝竹痕斑處吊湘君蜀江水向荆門落楚
客帆從劍閣分三地相思徒極目數聲南鴈萬
重雲

夜遊玉磬山

玉磬山前夜氣涼白雲橋上月如霜殘虹收雨
歸僧院宿鳥啼烟近女牆四月野花皆欲語十
年石字不成行吏情轉覺青山遠魂夢時能到
故鄉

范將軍招遊西湖

綸巾竹杖臨風前魚趁荷花鷗獨眠十里青山
兩峰月幾行堤柳六橋烟菰蒲夾岸望不了簫
鼓中流春可憐海上近傳烽燧息將軍且泛五
湖船

送烏程袁尹赴虞部

碧浪湖邊柳滿船一枝聊贈使君鞭幾年作吏
花爲縣萬里歸朝鳥是仙粉署舊傳虞部選漢
家新計水衡錢看君疏草承明上民力東南絕
可憐

九日登峴山懷往歲芳期之遊寄陳振狂

徐興公

秋到關河葉盡飛
它鄉此日倍沾衣
白雲幾片家何許
黃菊滿籬人已非
夕靄望中征鴈沒
浪花深處暮颿歸
可憐佳節不成醉
空對青山愁落暉

雨中登道場山

繫棹堤邊楊柳枝
寒雲不斷雨如絲
雲中苔徑行時破
雨裏青山看更奇
水落平湖帆影近
秋

高遠塞鴈聲遲步
虛直上三千尺
一曲瑤笙倚檻吹

至日

菰城城頭陽已動
浮玉山前梅可憐
黃茅從事非吾意
青草春風空復年
蹤跡東西自萍梗
乾坤南北多烽烟
一官牢落竟何有
恰得囊中沽酒錢

白蘋洲夜泊寄懷鄭翰卿

霜落蒹葭十里秋
西風吹冷白蘋洲
金光一道

下流集 卷之五
湖邊月玉笛數聲山外樓南國懷人成遠夢東
山生事有孤舟風塵日日悲遊子羞對磯頭雙
白鷗

贈黃道元

客食長安秋已分歸來劍氣動星文讀殘東觀
三千史袖得西山一片雲玄草共嘲楊執戟黃
庭應失右將軍它年鴈宕還攜女題破蒼苔十
里紋

登樵李烟雨樓

一片澄江淨如練令人對此思孤騫濤聲夜送
千峰雨樹色寒飛百道烟野氣遙涵歸鴈陣蘆
花初出釣魚船霸圖王氣東南盡四壁猿啼落
日邊

題東嵐秋思卷

余先世居海上之東嵐以避倭遷馬江
之南至余七世矣祖得主氏有東嵐秋
思卷思先人也

八百峰頭碧海西秋風禾黍舊黍黎于今爽

開亭郭可是當年厭鼓鼙華表鶴歸人不見王
孫草綠鳥空啼桑田斥鹵尋常事莫向青山怨
馬蹄

衰柳寒烟秋黯然故家遙在海雲邊嵐光含雨
歸空墅蜃氣隨潮送客船人世蕭條成往事松
楸遠近自流年而今便欲乘槎去回首滄江又
可憐

登愛山臺

橫塘十里柳花開一片孤城列岫廻作吏幾人

能載酒愛山無日不登臺江頭晴色虹橋斷樹
裡濤聲碧浪來欲向殘碑尋故事千家燈火暝
鐘催

清明重過王村禪寺

殊方佳節強登臺又見僧房花木開啼鳥不知
春欲去白雲還喜客重來山含殘日明禪榻竹
颺遊絲入酒杯雙屐莫愁歸路晚半林殘月上
蒼苔

錢唐懷古

嚴城遙控大江流江上雲寒雨未收過客登樓
聞海嘯舟人移纜避潮頭西湖歌舞春長在南
渡山河樹已秋惟有飛來峰頂月當年曾照翠
華遊

聞徐惟和北遊寄之

夢君兄弟芋江頭萬事驚心一葉秋雞骨不支
多病後馬頭又作隔年遊白雲幾處勞回首綠
玉何人共倚樓若問吳興近消息五湖東畔有
扁舟

淞江舟中

秋城隕霜彫碧梧遠天淨水明平蕪長年換柁
浪出沒客子狂歌愁有無隔水人家放鵝鳴西
風短岸吹菰蘆勞勞行役不稱意日夕看雲哀
故都

舟過南潯飲董大宗伯宅

綠野堂開列岫迴長林風起鴈聲哀天邊落木
微微下江上浮雲隱隱來野人自有東山屐地
主應空北海杯潦倒不堪論出處干戈未定髮

毛催

十月吳江舟中晚望

年年改歲長爲客無奈愁心付酒缸寒鴈背風
歸越渚孤帆帶雨下吳江黃知霜後枳三寸白
起沙邊鷺一雙日落洞庭天似水青山無數入
雲窻

飲黃白仲浚羅館留贈

蠟屐相逢歲欲闌新詩題遍碧琅玕一尊白墮
花前貫四壁青山枕上看鴈帶斷雲歸河晚風

曉夢三三枕寒知君閉戶脩藥爲問金墮幾
幾丹

甲午除夜自檣李歸省

爐紅酒綠劇爲歡莫問人間行路難萬里客心
悲戍角一年殘夜試辛盤風塵暗逐年光轉霜
鬢難禁春色寒最是燈前兒女在不妨雙袖舞
斑斕

送王玉生遊吳

馬度春溪孤月明一聲殘笛客心驚江村雨過

桃花盡野店風多麥穗鳴歸夢遙隨閩海鴈離
人愁上闔閭城霸圖王氣都休問但向蘇門寄
此生

登鹽官秦逕山

獨倚孤峰望野烟海風吹浪欲浮天早秋角動
軍城戍落日潮生估客船霸業東南餘越土殘
碑甲子自秦年傷心千載興亡地晴鳥寒猿夕
嶂邊

送程彥之遊塞上

擊筑休歌行路難壯心直爲斬樓蘭風吹紫塞
草欲盡馬蹴黃河水未殘楊柳笛中秋月苦芙
蓉匣裏夜霜寒功成露布鞍前草應在祁連絕
頂看

病中書

伏枕悠悠突未烟湯將身世付桑田春光半入
黃梅雨月俸都爲買藥錢遼左捷書何日到浙
西逋稅幾時蠲花前杜宇聲聲急歸掃山中屋
數椽

舟中病陳參軍以詩來問

朝聞鴻鴈斷南羣人事蕭條日易曛
病裏琴書長是罷秋來風雨不堪聞
荒陂兩岸生黃葉遠浦孤帆帶白雲
憐女題詩到天末未應鮑氏有參軍

壽同安李令又六十

曾跨青牛下九垓姓名久已在丹臺
庚申壇上凡三守甲子人間又一迴
白髮不隨秋菊晚斑衣遙帶海雲來
爲君典盡烏程酒更借平湖作

壽杯

病中逢鄉人

獨樹當窻蟬亂悲江城五月落花時
兵戈何日旄頭落衰病經年帶孔移
新筍雨中織似手遠山夕後黛如眉
無端驛路逢鄉信一夜歸心憶荔支

雨

五月六月雨不止茗溪雪溪流乍添
新苗已飽魚鼈腹老樹半濕蛟龍髯
日日枹鼓起窮巷家

家機杼愁新縑閉門高枕不料事葛巾對柳師
陶潛

秋夜

一夜秋風逐鴈回驚聞數葉下蒼苔胡笳戍角
悲相語月色江聲晚自催西鄙戰塵新鬼哭東
方征騎羽書來乾坤未定頭垂白且覆花前濁
酒杯

七夕有松陵之行寄內

月照明河露下遲共傳牛女度佳期如何天上
相逢日正是人間乍別時鵲駕也應憐隔歲馬
蹄空復怨臨岐盈盈一水遙相望腸斷松陵楊
柳枝

乙未初度感懷二首

蚤歲空懷薜荔衣老來未息漢陰機出山小草
已如此流水浮萍多是非故國東南消息斷乾
坤西北風塵微無情芳杜年年綠惆悵王孫歸
未歸

幾年作吏病長侵每向滄洲歎陸沉莖露難消

丁集 卷之五
司馬渴尊鱸誰識季鷹心烽烟關塞愁中滿華
髮流年鏡裏深回首半生真過隙不堪落日聽
秋砧

夜坐

白蘋洲畔日初昏黃蘗山前片月痕露冷蒹葭
何處鴈風傳砧杵幾家村三年旅食供多病萬
里秋聲吹斷魂習靜已無車馬跡不須重署翟
公門

贈鄧女高民部

漢節翩翩出建章故人天上度支郎虎符搜盡
江南粟雞舌含來署裡香草綠三關過錦里潮
高八月度錢唐相逢先問青山事玉女峰頭字
幾行

寄贈車子仁太守

文采風流玉筍班坐分虎竹出閩關已將公事
湖中了卽有明珠海外還江閣花深開畫舫郡
庭吏散見青山越王臺上行春日五馬翩翩度
百蠻

送陶別駕歸楚

酒滿離亭片月虛臨岐欲別更踟躕由來世路
堪投杼何處王門可曳裾去棹遙隨湘浦鴈歸
心轉憶武昌魚故園松菊應無恙好向青山賦
遂初

哭張函一廣文

長安春日紫烟消客裡談詩破寂寥擊筑曾聯
燕市馬看花共典酒家貂三年蹤跡悲萍梗一
旦功名付鹿蕉歌罷招魂人已遠蕭蕭風雨玉

河橋

秋日同鄧女高登道場山得青字

搖落秋風江上亭醉攜雙屐度蒼冥雲封野寺
僧初定露滴寒松鶴未醒天外湖光當檻白杯
中峰影隔簾青歸來一片苕溪月處處漁歌倚
棹聽

過歸雲庵吊孫太初得秋字

路入歸雲一徑幽青山落日滿松楸老僧廢寺
瓢猶挂詞客荒墳草自秋九月空林聞蟋蟀百

年殘碣上蝸牛共將杯酒澆千古腸斷茗江天際流

十月時有播師又倭假道於浙入貢

蕭蕭落木送高秋鴻鴈聲悲獨倚樓砧杵千家寒轉急風烟十月暮生愁東方楛矢經吳地南國旌旗向益州三尺青萍猶未試漫將華髮付滄洲

喜徐興公來訪

抱病五日頭未梳故人千里來問余孤筇已挂何如

冬日同徐興公顧長卿世卿登峴山

鴻鴈孤飛人倚欄湖光峰影掌中看浪花風起兼天碧山葉霜深滿地丹酒借窪樽拚客醉月生車蓋照人寒相逢蹤跡渾難定一曲悲歌髮指冠

輪臺

已說播酋來請罪更聞關白受侯封
君王不愛璫林庫使者新收大宛筇
幾載牙籌愁歲計萬方金甲泣春農
輪臺今日應頒詔莫令甘泉再舉烽

黃白仲徐興公見過分得歸字

江城秋盡暮烟微二仲何來款竹扉
長夜頻添桑落酒輕寒初上薜蘿衣
虛亭過雨苔仍合獨樹驚霜葉盡飛
塵土相看俱是客不堪更送塞鴻歸

贈顧道行先生

十載歸來始二毛園依流水聽秋濤
詩從白社盟牛耳酒對青山擘蟹螯
投老又拋朱墨綬新詞初按鬱輪袍
茗溪如帶通吳地望斷松陵玉樹高

送徐興公之姑蘇

江抱狐城舊闔閭片帆東去雪花初
吳宮草色秋堪吊茂苑砧聲歲欲除
瘦馬飲殘支遁澗夜烏啼近館娃居
知君何處增惆悵落日寒潮泣

子胥

康元龍自寧夏歸談邊事有感二首

憐君疋馬戰場間風雪凋傷壯士顏漢地鼓鼙
通上郡秦城烽火近榆關防秋諸將皆承寵平
夏三軍尚未還莫向尊前談往事傷心最是賀

蘭山

沙場一望四時秋怕說前朝十六州磧北殘兵
俱作鬼山西老將未封侯雪深□馬窺關口月
暗秦笳怨隴頭知爾棄繻多慷慨燈前舍咲贈

吳鈞

鄧女高招遊毗山同王玉生徐興公陳永

奉賦

滿地金風吹夕曛客來驚起鹿麕羣松濤飛自
千峰落野氣遙從一水分獨鶴啼殘蒼弁月遠
帆歸帶洞庭雲天涯幸有同心侶尊酒何妨盡

日醺

送徐興公還家

楓落空江生凍烟西風羸馬不勝鞭冰消浙水

知家近春到閩山在客先斜日鴈邊看故國孤
帆雪裏過殘年憐予久負寒鷗約魂夢從君碧
海天

丙申元日

東風一夜動庭柯雪水冰消生綠波客路風塵
還昨日高堂霜髮近如何盤傳青菜逢人少門
掩蒼苔見雨多三十年來駒過隙可憐無計一
回戈

錢唐逢鄭翰卿

壯士相悲不問年青袍白馬紫絲鞭一身作客
長看月五度逢春半在邊細雨垂楊淮口渡平
蕪芳草蘄門烟更聞西北風塵滿醉把吳鉤咲
倚天

同鄭翰卿黃白仲汪肇邵遊淨慈寺

春色湖光散大堤鶯聲初上綠楊枝水邊尋寺
雲深處樓上看山雪盡時梅影半侵禪榻冷曇
花網落講壇遲天涯孤客成何事欲借珠林一
鶴騎

早春對雪寄葉進卿太史

道場山下暮潮平，無數江梅刺眼明。
水氣近城寒不散，雪花帶雨濕難成。
雲連京國孤臣淚，草綠西吳萬里情。
世路悠悠君莫問，夷門今已老侯生。

遼陽

遼陽消息近如何，戰骨無收復議和。
祇見大庭初遣使，旋聞瀕海罷防倭。
璫林內庫開應少，畫省孤臣謫已多。
獨有杞人憂不寐，側身天地欲

狂歌

春興二首

日落柴扉啼晚鶯，暖風吹雨過江城。
三春楊柳豈心事，滿地薜蘿非世情。
越客南冠長臥病，口塵北望尚橫行。
故園弟妹音書絕，愁聽終宵鴻鴈聲。

柔風吹雲雲不飛，退食閉門花事微。
茗溪草堂白日暮，故園梅柳青春非。
普天有吏索金帛，四海何人解鐵衣。
八騶七尺豈予志，塞鴻社燕行

當歸

哭顧道行三首

早向閩山賦采薇十年長拚白雲扉玉樓天上
名還在金谷園中事已非繁雪春添慈母髮芳
苔夜上使臣衣盈盈一水西州路泪洒吳江舊
釣磯

薤露難招壯士魂身隨箕尾別吳門匣餘紫氣
雙龍劔家有青山數畝園夜雨長鯨歸震澤秋
風吊客散平原由來國士恩難報欲挂吳鈎夫

政言

王樹朝霞春可憐談詩已嬾學逃禪老歸白社
長耽酒貧買青山不受錢蒿里歌殘人已遠梨
園樂散譜空傳定知紫氣西行後留得真言字
五千

錢唐逢胡元瑞賦贈

一着青衫二十年浪遊祗有杖頭錢客來花下
頻浮白雲滿柴門獨草玄羅刹江寒濤似雪蘭
陵春暖酒如泉與君共蠟平生屐踏破吳山十

里烟

郡齋閒居陳伯孺見過

翟門久已罷逢迎
日日花間醉未醒
芳草乍驚騎馬客
使君閒讀種魚經
雲開曙色來蒼弁
水落晴湖見洞庭
山杏初紅春酒綠
今宵眼爲故人青

登慈雲嶺

玉削夫容翠插屏
春風吹過柳條青
孤雲半逐
落殘日時兼雨氣
腥怪石當空疑虎伏

松映水作龍形自慙京洛風塵久
夢繞烟波湖上亭

夏日陪郡寮登黃龍洞望太湖至夜歸卽

席作

斗酒過從日未曛
嵐光水氣晝氤氳
何來帆影空中失
不盡濤聲樹杪聞
洞口龍飛三伏雨
尊前風落五湖雲
歸來倚棹看殘月
清漏何須報夜分

寄曾人倩

折柳都門五見春天涯相問各風塵驚心燕市
歌誰和回首龍江迹已陳嶺表梅花虛驛使湖
邊菱芡屬孤臣長安西北浮雲遠誰念憂天有
杞人

病

門掩孤城對夕嵐繩牀襪被一瞿曇愁聞口馬
關山北夢逐江鴻瘴海南腰計月消難東帶髮
經秋短不勝簪年來叔夜無人問衰懶真成七
不堪

題林純卿孤山精舍

挂冠日日醉紅裙爲愛孤山麋鹿羣半洞榻容
寒鶴宿小樓月與道人分階飛秋葉蕭蕭雨窻
落晴湖片片雲焚罷名香無剝啄采蓮一曲隔
花聞

秋日偕陸履素轉運鄭翰卿山人汪肇邵

太學登北高峰四首

絕壑悲風吹白袍清秋落日正蕭騷接天水色
西湖小拔地山形北極高嵐氣夜飛天竺雨寒

空晴見海門，濤忽驚雲際。
衣裳冷解得，金魚典濁醪。

峰盤路折轉嶙峋，坐覺虛無物外身。
上界有門通碧落，下方無地不黃塵。
天邊江樹當潮近，雲裡僧寮與鶴隣。
呼吸想應聞帝座，獨慙詩句不驚人。

咫尺星辰勢可呼，千城萬竈錦模糊。
江聲遠近全吞越，王氣東南半入吳。
絕島寒生征鴈急，一天秋淨片雲孤。
步虛直上青鸞背，笑採蓬山幾

樹珠

空門一人息，諸緣況復憑。
虛思宵然栖，辟霞光千嶂。
曙抱城水氣，萬家烟塔經野火。
無僧住草合荒臺，有鹿眠盡日。
賞心看不足，不須留却買

山錢

題天竺寺

鳴雨乍過孤峰晴，六橋明滅澄湖平。
山路十里惟竹色，僧房盡日聞溪聲。
齋鐘初罷曉鳥落，爐烟不動秋雲生。
野猿聽法作人語，日夕相隨歸

化城

閏八月望日偕伯孺署中觀月二首

碧天如水靜無雲。此夕清光猶爲君。星聚祗緣
雙劍合。月明賸得兩秋分。霓裳影散當空見。金
闕香生下界聞。白苧歌殘霜露冷。寒宵桂子落
紛紛。

露華松影滿柴軒。坐對明河臥竹根。真有冰壺
堪濯魄。何來玉笛更銷魂。清砧入夜生村墅。獨
鴈凌寒向海門。萍梗相憐拚一醉。忽驚曙色上

秋原

送鄧女高還朝二首

飛霜落六滿江沙。萬里寒生漢使楂。驛路花稀
惟有菊。代期秋盡已無瓜。蕪城鴈影隨殘照。蘄
野砧聲帶暮笳。自笑周南尚留滯。送君腸斷憶
京華。

泪洒西風百尺臺。傷心且復罷銜杯。新畬盡逐
陽侯去。搜粟還聞使者來。千里灌輸車馬困。十
年逋負繭絲催。君王若問東南事。昔日繁華

幾劫灰

九日偕鄭翰卿震卿陳伯孺錢象先登南

高峰二首

霧散風高萬木凋客愁且向酒杯消天廻南紀
千峰盡地坼東甌一水遙僧引暮雲歸遠寺鴈
銜秋色入層霄怪來下界塵如海便欲吹笙逐
子喬

三秋嵐氣散溟濛萬里風烟見塞鴻塔影斜懸
星漢外鐘聲遙落海門東猿啼疊障寒雲斷日
照孤城野戍空醉去踏歌歸路晚滿林霜葉馬
蹄紅

贈錢象先

少年作賦早知名共道狂如禰正平寡和我猶
慙下里偏師君已得長城虎丘月落江聲暗鷺
嶺秋生木葉鳴借得西湖堪避世扁舟時載六
橋鶯

秋日屠緯真黃白仲鄭翰卿震卿見過吳
山署中時屠黃二君持齋

夫容花盡鴈初還客裏相逢斲解顏滿座詞人
皆楚調一尊秋色對吳山高談只合長堅壘佞
佛何須學閉關欲向滄洲結同社白雲深處弄
潺湲

送查別駕輓粟之金陵

微霜一夜動江梅別酒陽關數疊催千里泛舟
搜粟使六朝遺事雨花臺秦淮月落啼烏盡采
石江空候鴈哀我欲憑君聊借問烏衣燕子幾
時迴

丁酉迎春

榆火新烟滿近郊家家綠勝春醪寒雲半逐
歌梅落殘雪時添舞樹高柳陌初迎青玉輅梨
園齊唱鬱輪袍天涯尚有思歸客獨向東風感
二毛

早春感懷

鴉啼華門朝霞霏寒城吹角春日微新樹舊樹
爭間發晴雲雨雲相逐飛東土豺狼擊鼓急南
來鴻鴈音書稀五年去國衰疾甚長安天遠愁

依依

夢歸

山窻烟暖杏花肥。又見雕梁燕子飛。三月孤城春事盡，十年京闕故人稀。雨中謝豹聲聲急，枕上莊生栩栩歸。千里高堂雙白髮，看雲淚滿芰荷衣。

送吳翁升之金陵二首

河梁日落布颿開。水國新年燕未回。詞客早傳鸚鵡賦，春風先到鳳凰臺。隋宮雪盡生芳草，吳

苑寒消見落梅。回首故都凋敝甚，登樓王粲不須哀。

二月扁舟觸斷冰。少年彩筆劒光凝。南朝古寺尋僧入，北固春山帶雪登。蘆荻愁雲吳故壘，松楸夜雨晉諸陵。它時懷古還相憶，目斷長江如練澄。

東山

東山一別釣魚磯。回首長安意已違。時事堪同漆室嘯，世情未息漢陰機。江南使者探金穴，遼

左孤軍解鐵衣正是 君王垂拱日年來漸覺
諫書稀

飲傅金吾別業二首

竹外高樓接絳霞春風開遍野棠花將軍不愛
黃金埒稚子能調白鼻騮湖上羣山當郭遠橋
邊流水繞牆斜醉來處處迷歸路知是桃源第
幾家

繫馬垂楊倒接羅風流全勝習家池龍孫欲拆
春雷後魚子初生夜雨時啼鳥似呼歸去好落
花應咲客來遲紅塵白髮空憐我欲向青山賦
采芝

陳女翔見過

伏枕春深賦索居故人蹤跡日應疎十年閩海
書無鴈三月茗江食有魚酒熟烏巾堪問字山
開蒼弁待藏書怪來紫氣朝朝見可是青牛薄
板車

初夏鄭性之董崇相見過

背郭澄湖起夕陰草堂閒對弁山岑郡當蠶禁

長休沐人向雞盟問陸沉梅子欲黃春事盡苔
花乍綠雨痕深悲歌一曲看長劍知爾悠悠行
路心

道場山訪老僧不值

春盡烟消紫翠重上方晝掩不聞鐘窻臨雪浪
三千頃僧在寒雲第幾峰古寺香風吹簷蔔亂
山晴色散夫容斜陽宿鳥催歸去愁對西巖一
院松

送鄭性之歸閩就試

斗酒城陰乍別離相看衰髮各如絲十年更向
公車召一劍誰當國士知雲滿杉關征馬困風
高黯淡片帆遲素繻莫咲終軍事况是口沙未
靖時

吳山晚望寄屠緯真

一片秋山帶晚霞六陵宮樹半栖鴉風傳暮柝
三千戍月照寒砧十萬家野寺佛燈燃貝葉隔
江漁火隱蘆花相思已負東籬約空向清尊惜
歲華

秋夜碧浪湖懷鄧女高時女高將有嶺南
之役

西風把袂又瓜期紅葉青山憶別離千里月華
人去後半江秋色鴈來時交河野曠飛霜早雪
水寒輕落木遲此日風烟各行役嶺猿越鳥費
相思

題朱侍御清音閣

折檻當年志未酬漫將華髮付菟裘柳塘湖上
月侵閣山寺雲來雨近樓芳草綠遮騎馬路落

花紅清釣魚舟匣中未試雙龍劍夜夜寒光
斗牛

戊戌元日舟中

年來書劍兩無成華髮青陽幾度更春色不隨
人共老世情還逐歲俱生烟迷柳陌紅粧隊風
度梨園白苧聲畏路在人倍惆悵不堪重見下
菰城

題姚伯道臨雲閣

高閣層欄俯碧霄春郊梅柳發寒條尊開北海

星初聚門對西山雪未消
四坐管絃喧子夜半
牀書畫辨前朝定知客散雲深處未許塵蹤挂
一瓢

得報徒治留別諸同志

二月風波一葉舟
翟門客散暮雲愁
孤臣五鼎薪猶積
慈母三言杼已投
關塞風烟連鳳閣
家園生事賸貂裘
可憐去住渾無計
泪盡蒼江日
火流

已歸高冊楚許逐
鳴夷戰骨自古

憎偏急鷄肋于今棄已遲
竹閣梁空歸燕後
草堂人去落花時
君看海岸投簪者
悔作當年遊俠兒

下菴集卷之六

陳留謝肇淛著

潁川陳宏已選

五言絕句

聞漁歌

漁郎初學歌聲滿秋江水孤月出波中
鷓鴣驚飛起

碧浪湖晚望

日落湖水平涵虛氣杳冥歸帆天際盡一點峴

山青

蘭陵逢故人

蘭陵沽斗酒醉來歌送君
孤嶂吐微月空江生白雲

舟過七里灘

兩岼幾重山孤舟七里灘
灘聲千萬道併作釣臺寒

月夜江行

春水平如鏡青山雨後新
孤舟今夜月偏照異

鄉人

枕上聞鳥聲二首

露殘春葉稀日出花影衆
百舌隔窗啼驚破幽人夢

鳥語風中碎楊枝簾外斜
草堂春寂寂落盡碧桃花

錢唐觀潮

風捲潮頭黑日合海氣黃
浪花三十丈愁殺踏潮郎

采蓮曲二首

采蓮復采蓮，蓮葉大如斗。上有百子房，下有同根藕。

郎莫采蓮花，儂莫采蓮子。子去只空房，花落隨流水。

宿吳山樓二首

佛火明還暗，羈魂夢復驚。秋風一夜起，落葉與窻平。

故國星河暗，嚴更鼓角悲。孤猿後與斷，鴈況是夢迴時。

迴時

客夜苦寒

孤館燈初燼，層簷霜欲凝。吳山一聲鴈，客泪數行冰。

六言絕句

姑蔑舟中

一路山色雨色盡，日禽聲水聲。江上斜陽遠，艇天邊亂樹孤城。

題山中隱居

落日孤村野烟西風獨樹哀蟬坐對白雲處處
門看流水年年

春日舟中

芳草看人未去晚風吹酒初醒半夜潮歸月白
前林雪盡山青

贈行脚僧

錫杖驚飛孤鶴芒屨踏破千峰度海幾迴見月
隔林何處聞鐘

故鄣大雄寺對雨二首

木末凍雲不散空中法雨長飛山僧香前出定
澗風酒後吹衣
烟鎖禪林常暗雨來竹徑初斜隨風散入講殿
比丘指作天花

舟中二首

露濕釣竿獨坐日照蓬窻未起眼中無限世情
付與青山流水

隔江樹影山影近水漁家酒家南陸數聲孤鴈
西風兩岸蘆花

七言絕句

吳興竹枝詞十首

茗溪縈轉雪溪清，郎住溪頭妾在城。
幾度白蘋洲上望，風波日日斷人行。

柳葉長時桑葉繁，子規啼罷日黃昏。
西吳蠶禁今初起，萬室千村盡閉門。

清明鬪草踏青苔，賽得金釵逐隊回。
一道紅裙齊上馬，送場山上進香來。

春風女口口顏色新，共趁蠶忙陌上塵。
繭就絲抽爭賣却，不知衣着是何人。

妾家湖北守蠶眠，郎往湖南去販鮮。
一陣腥風船到處，家家爭買小頭鱸。

雨後新收顧渚茶，旗槍未展紫團芽。
緘來兩角留郎飲，半月泉頭汲水花。

何山五月熟楊梅，萬樹千林錦作堆。
摘下水盤三百顆，行人錯道荔枝來。

笠澤銀魚五寸鮮，南潯社蟹一尺圓。
沽得闔門三白酒，與郎同上遊湖船。

雪消臘盡北風寒官府迎春簇馬鞍對對梨園
扶暖簷樓頭不敢捲簾看

駱駝橋上落霞紅畫舫青簾信晚風玉笛吹殘
霜月白忽驚身在水晶宮

西湖棹歌四首

水落湖心松作濤水邊樓並兩峰高遙憐如雪
當樓女泪滿西風剪戍袍

蘇公堤上柳藏烏霧隱山前片月孤怪得薄情
不相見年來官府禁遊湖

荷葉莫采並頭蓮勸郎莫泛夜行船蓮花留取
成蓮子夜船驚破鴛鴦眠

蓮花如面水如烟郎愛西湖妾愛蓮郎心好似
湖心水花落花開知幾年

宮人斜

落花啼鳥怨青春生不啻恩死作塵長信月明
秋寂寂君王只夢李夫人

遊武夷雲窩懷陳孔震司馬

蘿衣石榻自苔文禮罷寒星不見君老鶴應門

黃葉墜半爐松火亂山雲

癸巳初度日病

文園臥裏忽逢秋馬齒風塵去未休二十七年
初度日悠悠病客一孤舟

宿吳山寄長安舊人

春時相送出燕都秋到江南一字無半夜寒燈
數行泪滿天風雨下西湖

攜李迎春二首

吳山越水色霏微日日紅塵上客衣愁裡不知

三五又盡清城歌舞報春歸

笑爐無燄夜愁長客裡逢春髮已霜不用傷心
更回首茗溪春好亦他鄉

雨夜懷陳振狂客嶺南

君去春山草木齊嶺猿林鳥莫雲西相思一夜
不成夢雨滴芭蕉雞亂啼

攜李元夕雪

天涯孤客怯春寒故國雲山夢裡看何處燈華
何處月北風吹雪滿征鞍

薛校書像

絳唇朱袖髮如烟管領春光二十年萬里樓臺
荒草地人間猶有薛濤箋

中秋登郡城樓

鄉心如水向東流愁上城南百尺樓故國雲山
何處是天邊明月又中秋

觀天聖寺畫竹趙子昂妻管氏作

誰將彤管貌琅玕雲影蕭蕭半壁寒月滿菰城
僧定後秋聲遙起錯龍盤

閨思

羅衣泪盡黛痕低芳草年年杜宇啼枕上夢魂
天畔月隨風一夜到安西

寒食山中

白雲流水淨含沙傍水斜陽三兩家一夜山中
寒食雨杜鵑啼落刺桐花

夜同鄭翰卿黃白仲步至孤山尋梅

望湖亭上大堤斜夜到孤山處士家殘雪滿林
霜月暗不知何處是梅花

吳興後竹枝詞四首

漕糧改折白糧催春雪初寒麥未栽聞道義倉
三十處無錢保正不教開

夏稅年年織較遲柘黃帕裹合羅絲近聞內府
頒新式解戶爭安第一機

五月新絲白勝綿輕羅織就雪花鮮爲郎製得
雙襠子官府頭行不敢穿

臘盡春生年復年望郎長在太湖邊水門不閉
聞簫鼓迴避黃堂採木船

錢唐逢康元龍

黃梅細雨暗江關我入西吳君欲還馬上相逢
須盡醉明朝知隔幾重山

錢唐訪陳伯孺不遇

旅館輕塵鎖綠筠知君遙在五湖濱錢唐江水
菰城月兩地相思不見人

登慈雲嶺

千重烟樹翠模糊萬壑松濤落日孤回首潮聲
聽不盡亂山影裏見西湖

西湖雜詩

柳花如雪暮烟多
荷葉初圓滿綠波
十五女兒能盪槳
月明低唱采蓮歌

右六橋烟棹

楓木橋西正夕陽
紫霞飛滿翠微房
霓旌百道搖空碧
併作三天舍利光

右三竺晚霞

懸崖石榻繡苔花
雲去雲來一徑斜
日午山僧初入定
滿天空翠濕袈裟

右石屋晴雲

萬樹桃花照夕曛
晚霞遙射碧氤氳
東風吹散飛如雨
盡入西湖作錦雲

右桃溪花雨

僊姑山畔小春橋
雲影松陰九里遙
萬壑悲風吹日夜
行人錯道浙江潮

右九里松風

斷橋流水暗香聞
月色梅花亂不分
誰向夜深吹玉笛
宿鴉驚散雪紛紛

右孤山梅月

白雲峰頂曉鐘殘
天半剛風徹夜寒
吹散紅波三萬丈
海門湧出紫金丸

右鷺嶺觀曦

寒松曲澗白雲長
雪竇泉飛五月涼
施得山僧新茗在
瓦鐺松火試旗槍

右龍泓漱玉

錦塘十里柳花秋
半逐東風撲釣舟
馬上紅裙踏歌過
低枝挂墮玉搔頭

右錦塘春柳

桃花水照石榴裙
宛轉歌聲隔水聞
日落江空不知處
兩高峰頂作行雲

右綵鷁紅粧

題月輪山

危塔殘碑鎖寂寥
不聞桂子落清霄
月輪山下天連海
一日僧看兩度潮

登五雲山五首

縣崖鳥道客心驚
翠壁參天水撼城
日落西陵

潮似雪亂山無數不知名

曉風吹雪度高峰禪榻虛窻倚碧空
夜半天雞醒客夢海門深處浪花紅

萬壑羣山水上浮滄江東接海門秋
天教菴背開金鏡幻出錢唐十四州

六橋烟柳遠濛濛忽聽南屏寺裡鐘
一對浮圖雲底出山僧指是兩高峰

月出潮平夜罷鐘琉璃倒映玉夫容
却疑身在蓬萊上弱水茫茫幾萬重

江南詞

阿嬌住近浣紗溪畫槩連檣隔水西
郎唱江南可憐曲柳花飛盡鷓鴣啼

春日橋李舟中寄僧圓憲二首

弱柳新鶯動隔年春山殘雪對書眠
老僧有句來相報烟雨樓西一釣船

出世無心萬事慵門臨流水最高松
相思何處不相見明月空江半夜鐘

中秋雨寄桃葉侍兒

雲鎖霓裳桂殿空金樽祗對遠山鐘珠簾不捲
銀屏暗人在瓊樓第幾重

愁雲踈雨暗金波天上人間夜若何玉笛吹殘
無限恨盈盈一水卽銀河

聞鐘寄曾人倩

十年去國夢滄浪夜夜鐘聲似上陽謾憶長安
驅馬伴東華門外月如霜

下菰集卷之六

終